

पावलसे रोमला विश्वासीगदेदा भ्रिबा चिठी

चु चिठीला बारेरी पाङ्तो:मा

भ्रिबा म्हि: येशूला मुल चेला पावलसे भ्रिबा मुबा (रोमी १:१)। चु चिठी भ्रिबाला लागिरी पावलदा तर्तियस भिबा म्हिसे हो लबा मुबा (रोमी १६:२२)।

भ्रिबा ग्ला: कोरिन्थ शहररी भ्रिबा मुबा।

भ्रिबा साल: ओस्पन ईश्वी संवत् ५६-५७ (विक्रम संवत् ११३-११४) सालरी भ्रिबा मुबा। चु चिठी पावल थाबा पिन्बा समाचार थे:ना लबारी निबा सोमरेमला पालला धुइ जिन्बारी छ्याइमा भ्रिबा मुबा।

खाल्दा भ्रिबा: रोम शहररी मुबा विश्वासीगदेदा भ्रिबा मुबा।

पावल चु चिठी भ्रिबा धुइधोना रोम शहररी निबा आरेमुबा। तर रोम शहररी मुबा विश्वासीगदेदा हुप तसी थेनीगदेदेन छ्याम तिगै धिनधोना चिसी गे लबा सेम मुबा। ओच्छे थेनीगदेग्याम तिगै हो किन्सी स्पेन यहुल्सारी थाबा पिन्बा समाचार थे:ना लबारी निबा पावलला सेम मुबा। चु चिठी थेसे विश्वासीगदेसे आघोनान आतबा तामगदे घोना लबाला लागिरी भ्रिबा मुबा।

पावलसे रोम यहुल्साला मण्डलीदा फ्याफुल्बान थेनीगदेला लागिरी थेसे प्रार्थना लबा तामगदे उन्बा मुला। ओच्छे परमेश्वरला डाच्छा यहूदीगदे मुसैनोन अर्गु यहुलला म्हिगदे मुसैनोन पाप ख्लासी परमेश्वरदा सेम निबा म्हि ततो:ला भिसी पाङ्बा मुला। तिगदा भिसम जम्मान म्हिगदे पापला तहरी मुला। ओच्छे हाडदा परमेश्वरदा सेम निबा म्हि स्होबाला लागिरी येशू ख्रीष्टदा विश्वास

लनोन तोःला भिसी पाङ्बा मुला। जमाहेन्से येशूदेन छ्याम गिक तमाहेन्से याङ्बा छार जुनीला बारेरी पाङ्बा मुला। येशूदा विश्वास लबागदे परमेश्वर मुबा ग्लारी निम्याङ्गला ओच्छे थेदा परमेश्वरला आत्मासे पापदेन कालला शक्तिग्याम फेला। ओच्छे ५ अध्यायहेन्से ८ अध्यायधोनारी विश्वास लबागदेदा परमेश्वरदा सेम निबा म्हिगदे स्होबा तामला बारेरीदेन परमेश्वरला आत्माला शक्तिसे लबा गेला बारेरी पाङ्बा मुला।

जमाहेन्से परमेश्वरसे म्हि यहुलला लागिरी म्हन्बा अन्छार यहूदीगदेदेन अर्गु यहुलला म्हिगदे खाहङ् लसी खबारी खम्ला भिसी ड्योङ्बा तामला जोहाब पिन्बारी म्हाङ्बा मुला। यहूदीगदेसे येशूदा विश्वास आलबासे लमा अर्गु यहुलला म्हिगदेसे येशूदा विश्वास लसी परमेश्वरला दयामाया याङ्गै भिबा परमेश्वरला सेम मुबा।

चिठीला थुमरी स्थान्दोगदेदा माया लजी भिसम परमेश्वरदा ताङ्ना लखम्ला भिसी भिबा मुला। परमेश्वरदा तेन्बा, विश्वासीगदेसे ह्वाङ्गला यहुल्साला लागिरीदेन स्थान्दो म्हिगदेदा लतोःबा गेगदेला बारेरीनोन भिबा मुला।

मुल तामगदे

- फ्याफुल्बादेन धन्यवादला प्रार्थना १:१-१७
- म्हिगदेसे याङ्गोन तोःबा थार्बा १:१८-३:२०
- थार्बा याङ्गाला लागिरी परमेश्वरसे उन्बा ग्याम ३:२१-४:२५
- ख्रीष्टग्याम याङ्बा छार जुनी ५:१-८:३६
- परमेश्वरसे म्हन्बा अन्छार यहूदीगदेसे याङ्बा ताम ६:१-११:३६
- ख्रीष्टदा विश्वास लबागदेला बानीबेहोर १२:१-१५:१३
- चिठीला थुमरी भिबा ताम १५:१४-१६:२७

पावलसे रोमला विश्वासीगदेदा भिबा चिठी

१ लास्सो, रोमरी मुबा जम्मान म्हिगदेदा डा पावलग्याम फ्याफुल्ला। डा येशू ख्रीष्टदा तेन्बा म्हिदा परमेश्वरसेन मुल चेला दोबारी धम्बा हिन्ना। ओच्छे थार्बा पिन्बा समाचार थेःना लबाला लागिरी धम्बा हिन्ना। २ चुनोन थार्बा पिन्बा समाचार परमेश्वरसे दडबोरीन हाडला म्हिगदेदा पिन्ना भिसी अगमवक्तागदेग्याम सुड्बा मुबा। थेनोन थार्बा पिन्बा समाचार परमेश्वरला बचनरी भिबा मुला।

३ थे थार्बा पिन्बा समाचार चा परमेश्वरला भा यहाडला प्रभु येशू ख्रीष्टला बारेरी हिन्ना। थे म्हि दोसी दाऊद ग्लेला वंशग्याम न्हजी। ४ म्हि दोसी न्हसैनोन थे स्वर्गग्याम फेप्खबा मुबा, यहाडला प्रभु येशू ख्रीष्टदा परमेश्वरला भा हिन्ना भिसी परमेश्वरला आत्माला शक्तिसे उन्बा अन्छार परमेश्वरसे थेदा सिबाग्याम सोना लजी। ५ यहाडला प्रभु येशू ख्रीष्टग्याम परमेश्वरसे डन्दा

दयामाया लसी ख्रीष्टला गे लबा मुल चेला स्होबा मुला। जम्मान यहुलला म्हिगदेसे विश्वास लगै ओच्छे थेसे कुल्बा ताम ड्यान्गै भिसीन डाइ ख्रीष्टला लागिरी चु गे लबा हिन्ना। ६ थेनीगदे न्हडरी एनीगदेदा एनोन येशू ख्रीष्टला हाडलान म्हि स्होबारी ड्योइबा मुला।

७ परमेश्वरसे माया लसी हाडला म्हिगदे स्होबारी ड्योइबा रोम यहुल्साला म्हिगदे, एनीगदेदा यहाडला परमेश्वर आबादेन प्रभु येशू ख्रीष्टला दयामायादेन शान्ति तगै।

धन्यवादला प्रार्थना

८ जम्मान भन्दा डाच्छा डाइ डाला परमेश्वरदा येशू ख्रीष्टग्याम एनीगदे जम्मालान लागिरी धन्यवाद पिन्ना। तिगदा भिसम एनीगदेसे ख्रीष्टदा विश्वास लबा ताम जम्बुलिङला जम्मान म्हिगदेसे थेःबा मुला। ९ डाइ सदन प्रार्थना लबा धुइरी एनीगदेदा गाते ढन्बा मुला भिबा ताम परमेश्वरदान था

मुला। डाइ थेनोन परमेश्वरला भाला समाचार थे:ना लसी थेदा सेमहेन्सेन तेन्बा मुला। ^{१०}परमेश्वरसे म्हन्बा अन्छार डा जस्तो लसीन एनीगदे मुबा ग्लारी खबारी खम्बौ भिसी डाइ प्रार्थना लमा सदन परमेश्वरदेन छ्याम बिन्ती लबा मुला।

^{११}तिग्दा भिसम परमेश्वरला आत्मासे पिन्बा मोलम एनीगदेदा पाङ्सी ख्रीष्टथोरी लबा विश्वास कोङ्ना लबाला लागिरी एनीगदेदेन छ्याम हुप तबा डादा ल्हानान सेम मुला। ^{१२}ओच्छे यहाङ न्हीलान विश्वासग्याम गिकसेम गिकदा भङ याङ्गै भिबा डाला सेम हिन्ना।

^{१३}ज्योज्यो आले नाना आडागदे, चु ताम एनीगदेदा था तगै भिसी डाइ म्हन्बा मुला। अर्गु ग्लाला म्हिगदेसे हङ लसी रोमला अर्गु यहुलला म्हिगदेसेनोन विश्वास लगै भिसी डा ल्हानान रेम एनीगदे मुबा ग्लारी खबा सेम लजी। तर डा दान्देधोना एनीगदे मुबा ग्लारी खबारी खम्बा आरे।* ^{१४}ग्रीक† म्हि हिन्सै आहिन्सै, पढब लबा मुसै आरेसै जम्मादान थार्बा पिन्बा समाचार थे:ना लबा जिम्मा डाला हिन्ना। ^{१५}थेतबासेलमा एनी रोमरी चिबागदेदाएनोन थार्बा पिन्बा समाचार थे:ना लबारी डादा ल्हानान सेम मुला।

थार्बा पिन्बा समाचार

^{१६}चु थार्बा पिन्बा समाचार थे:ना लबारी डा आपे:मुला। तिग्दा भिसम विश्वास लबागदे जम्मालान लागिरी चु थार्ना लबा परमेश्वरला शक्ति हिन्ना। डाच्छा यहूदीगदेदा थार्ना लबाला लागिरी हिन्ना, थेहङ लसीन अर्गु यहुलला म्हिगदेला लागिरीनोन हिन्ना।* ^{१७}चुनोन थार्बा पिन्बा समाचारसे म्हिदा परमेश्वरदा सेम निबा म्हि दोबारी लोप्ला, ओच्छे विश्वासग्यामसेन डाच्छाहेन्से लिच्छाधोना परमेश्वरदा सेम निबा म्हि दोबारी खम्बला। तिग्दा भिसम बचनरीनोन “जुन म्हि विश्वासग्याम परमेश्वरदा सेम निबा म्हि दोबा मुला, थेसेन जुकजुकधोनाला जुनी याङ्ला” भिसी भिबा मुला।*

म्हिसे परमेश्वरदा सेम आनिबा गे लबा

^{१८}म्हिगदेसे परमेश्वरला बिरोध लसी पापदेन आज्यबा गे लबासे लमा परमेश्वर बोमो खसी थेनीगदेथोरी स्वर्गग्याम सजाय खबा मुला। थेनीगदेसे लबा आज्यबा गेसे सत्य तामदा नाङ्सी थान्बा मुला। ^{१९}परमेश्वरला बारेरी घोखम्बा ताम

१:१४ चु पदरी “ग्रीक” भिबा चा थे धुइरी जम्बुलिङरी जम्मान भन्दा ज्यबा रिमठिम मुबादेन ल्हानान ताम सेवा घोबा म्हि भिबा हिन्ना।

१:१३ मुल १६:२१ १:१६ मर्कू ८:३८ १:१७ हब २:४

चा थेनीगदेला डाच्छान मुला। तिगदा भिसम थे ताम परमेश्वरसे थेनीगदेदा उन्सी जिन्बा मुला। ^{२०}मिहसे म्राङ्आखम्बा परमेश्वरला गुण, खाइमै आम्हाबा थेला शक्तिदेन बानीबेहोर चु जम्बुलिङ छ्यामाहेन्से परमेश्वरसे स्होबा जम्मान स्हेगदेग्यामसेन म्राङ्बा मुला। थेतबासेलमा थेनीगदेसे तिगै निउ लबा ग्याम आरे।

^{२१}थेनीगदेसे परमेश्वरदा डोसेसी-नोन परमेश्वरदा लतोःबा मानदेन जयजयकार आलनी ओच्छे परमेश्वरदा धन्यवादएनोन आपिन्नी। बरु थेनीगदेसे म्हन्बा आज्यबा तामग्यामसेन थेनीगदे गे आखेलबा मिह दोजी। ओच्छे थेनीगदेला आज्यबा सेम भन धोपधोपसे प्लिङ्जी। * ^{२२}थेनीगदेसे हाडसे हाडदान बुद्धि मुबा मिह भिसी भ्रजी, तसैनोन थेनीगदेलान तामसे थेनीगदे मूर्ख दोबा मुला। ^{२३}थेनीगदेसे खाइमै नाश आतबा य्हालदेन शक्ति मुबा परमेश्वरदा तेन्बा ख्लासी नाश तसी निबा मिह, जन्तु, चरागदेदेन सुल्सी भ्रबा जन्तुगदेला मूर्ति स्होसी तेन्जी। *

^{२४}थेतबासेलमा थेनीगदेला नइबा सेमसे तिग लइ म्हन्बा, थे अन्छार लसी भ्रबारी परमेश्वरसे थेनीगदेदा ख्लासी पिन्जी। थेनीगदेसे हाड हाड न्हडरी ब्रेल्सी पेःबा खबा पाप गेगदे लजी। ^{२५}थेनीगदेसे सदन जयजयकार

लतोःबा जम्मान स्हे स्होबा परमेश्वरदा तेन्बा ख्लाजी। ओच्छे परमेश्वरसे स्होबा स्हेगदेदा चा तेन्जी। चुहङ् लसी थेनीगदेसे परमेश्वरला सत्य तामदा लुसीला तामदेन छ्याम देप्जी।

^{२६}थेतबासेलमा परमेश्वरसे थेनी-गदेला आज्यबा सेमसे म्हन्बा अन्छारलान पेःबा खबा गेगदे लबारी ख्लासी पिन्जी। ओच्छे थेनीगदेला मिङकोलागदे हेम्कोलादेन छ्याम आम्हेर्ना मिङकोला मिङकोलान ब्रेल्सी भ्रजी। ^{२७}थेहङ् लसीन हेम्कोलागदे मिङकोलादेन छ्याम आम्हेर्ना बैससे क्रोसी हेम्कोला हेम्कोलादेन छ्यामनोन ब्रेल्सी भ्रजी। ओच्छे थेनीगदेसे लबा आज्यबा पेःबा खबा गेला सजाय थेनीगदे हाडसेन नाजी।

^{२८}थेनीगदेसे परमेश्वरदा तेन्बा सेम आलबासे लमा परमेश्वरसे थेनीगदेदा थेनीगदेलान न्होङ्बा सेमसे म्हन्बा अन्छारलान गे लगे भिसी ख्लासी पिन्जी। ^{२९}थेनीगदेला सेम जम्मान आज्यबा ताम, लोभदेन बोमोसे प्लिङ्बा मुला। थेतबासेलमा थेनीगदेसे डाह लबा, मिह साइबा, छेबा बङ्बा लबा, मिहदा भुक्याब लबा, स्थहान्दोला बारेरी आज्यबा म्हन्बा, मिहला तामगन लबा, ^{३०}ओच्छे स्थहान्दोला बेइज्जत लसी भ्रबा, परमेश्वरदाएनोन हेलालबा,

डा हड्बा खालै आरे भिसी हाडसे हाडदान घेन स्होबा, स्थहान्दोदा मान आलबा, आबा आमासे कुल्बा ताम आड्यान्ना आज्यबा गे जे लबारी छार छार ग्याम म्हाइबा, ३१ थेहड् लसी थेनीगदे मूर्ख दोसी लला भिबा गे एनोन आलमुला। चु म्हिगदे चा दया आरेबा म्हि हिन्ना। ३२ चुहड्बा गे लबा म्हिगदे परमेश्वरला ठिम अन्छार सितो:बा मुला भिबा ताम थेनीगदेदा थानोन मुला, तसैनोन थेनीगदेसे चुहड्बा आज्यबा गे लबा जे आहिन, चुहड्बा आज्यबा गे लबा स्थहान्दोदा एनोन भड पिन्मुला।

परमेश्वरसे लबा निसाफ

२ थेतबासेलमा स्थहान्दोदा दोष लबा म्हिगदे, एनीगदे जुन मुसैनोन डाइ गल्ली लबा आरे भिसी तिगै निउ लबा ग्याम आरे। स्थहान्दोदा दोष लबा तामग्यामसेन एनीगदे दोषी तबा मुला। तिगदा भिसम एनीगदेसे जुन गेग्याम स्थहान्दोदा दोष लबा मुला थेनोन गे एनीगदेसेनोन लबा मुला।* २ चुहड्बा गे लबा म्हिगदेदा परमेश्वरसे ठीक निसाफ लला भिबा ताम यहाडदा था मुला। ३ एनीगदेसे चुहड्बा आज्यबा गे लबा म्हिगदेदा दोष लमुला। तर हाडएनोन थेहड्बान आज्यबा गे लसी भ्रमुला। तिग परमेश्वरसे निसाफ लबा धुइरी

एनीगदे चा स्योम्याडुला भिसी म्हन्बा? ४ परमेश्वरसे एनीगदेदा गाते माया लमुला, ओच्छे हाडदेन छ्याम थान्बारी गाते सेम लमुला भिबा ताम एनीगदेसे पक्कान म्हन्बा आरे। परमेश्वरसे एनीगदे हाड हाडला पाप ख्लासी हाडपट्टि दो:गै भिसी भ्रान्बा मुला। थेतबासेलमा एनीगदेदा गाते ज्यना लमुला भिबा ताम एनीगदेदा था आरे?

५ तर एनीगदेला कोड्बा सेमदेन परमेश्वरपट्टि दो:बारी आम्हाइबासे लमा परमेश्वरसे ठीक लसी निसाफ लबा धुइरी एनीगदेसे ल्हानान सजाय याड्ला। ६ तिगदा भिसम परमेश्वरसे जम्मान म्हिदा थेनीगदेसे लबा गे अन्छार इनाम पिन्ना।* ७ सेम नासी ज्यबा गे लबान परमेश्वरला घेन यहालदेन मान ओच्छे जुकजुकधोनाला जुनी याड्बारी म्हाइबा म्हिगदेदा चा परमेश्वरसे जुकजुकधोनाला जुनी पिन्ना। ८ तर स्थहान्दो म्हिगदेसे हाडला जे ग्याम च्यासी सत्य ताम अन्छार आभ्रमुला, ओच्छे पाप गे जे लसी भ्रमुला। थेहड्बा म्हिगदेदा परमेश्वरसे सजाय पिन्ना। ९ आज्यबा गे लबा जम्मान म्हिगदेथोरी आपत विपतदेन दुख खला। चुहड्बा दुख डाच्छा यहूदीगदेथोरी खला, थेहड् लसीन अर्गु यहूलला म्हिगदेथोरी-नोन खला। १० तर ज्यबा गे लबा

म्हिंगदेदा परमेश्वरसे ज्यबा भिसी मानदेन शान्ति पिन्ना। चु जम्मान ताम परमेश्वरसे डाच्छा यहूदीगदेदा पिन्ना, थेहङ् लसीन अर्गु यहुलला म्हिंगदेदाएनोन पिन्ना। ११तिग्दा भिसम परमेश्वरसे खालैलान ली च्यासी निसाफ आल।*

१२परमेश्वरसे मोशादा पिन्बा ठिम था आयाङ्ना पाप गे लबा अर्गु यहुलला म्हिंगदेएनोन नाश तला, ओच्छे थे ठिम था याङ्सीनोन पाप गे लबा यहूदीगदेदाएनोन थे ठिमग्यामसेन निसाफ लला। १३तिग्दा भिसम मोशाला ठिम सेसी घोसी जे परमेश्वरदा सेम निबा म्हि दोबारी आखम। तर ठिम अन्छार गे लबा म्हि चा परमेश्वरदा सेम निबा म्हि दोला। १४अर्गु यहुलला म्हिंगदेदेन छ्याम परमेश्वरसे मोशादा पिन्बा ठिम आरे। तसैनोन थेनीगदे न्हङला कोइ कोइसे हाङला बानीबेहोरग्याम लबा गेगदे ठिमदेन छ्याम ढिकबासे लमा थेनीगदे हाङनोन ठिम तेबान हिन्ना। १५थेनीगदेसे लबा गे ठिमदेन छ्याम ढिकबासे लमा थेनीगदेला सेमरीन ठिम मुला भिसी उन्मुला। थेतबासेलमा थेनीगदेला सेमसे खाइमाम दोष उन्मुला, खाइमाम भङ पिन्मुला। १६चु ताम परमेश्वरसे येशू ख्रीष्टग्याम म्हिला सेमला ताम निसाफ लबा धुइरी तला। थे ताम

डाइ एनीगदेदा थार्बा पिन्बा समाचार थे:ना लबा धुइरी पाङ्सी जिन्बा मुला।

ठिम अन्छार भ्रबा जे यहूदी हिन्ना

१७तर एनीगदे यहूदी हिन्ना भिसी परमेश्वरसे मोशादा पिन्बा ठिमला भररी भ्रमुला, ओच्छे डनी परमेश्वरसे धम्बा म्हि हिन्ना भिसी घमण्डएनोन लमुला भिसम, १८एनीगदेदा परमेश्वरला सेमला तामएनोन था मुला, ओच्छे तिग ज्यबा हिन्ना भिबा ताम था मुला, तिग्दा भिसम एनीगदेसे ठिमग्याम लोप्बा मुला। १९थेहङ् लसीन एनीगदे हाङसे हाङदान काना म्हिंगदेला नेतादेन धोपधोपरी भ्रबा म्हिंगदेला लागिरी य्हाल हिन्ना भिसी भ्रमुला। २०ओच्छे मूर्ख म्हिंगदेदा ज्यबा ग्याम उन्बादेन आसेबा आघोबा म्हिंगदेदा लोप्मुला भिसी म्हन्मुला। तिग्दा भिसम एनीगदे ठिमग्यामसे जम्मान सत्य तामदेन बुद्धि याङ्बा मुला भिसी भ्रमुला। २१चुहङ् लसी स्थान्दोदा लोप्बा ताम अन्छार एनीगदे चा तिग्दा आभ्रबा? ओच्छे स्थान्दोदा चा य्हो लबारी आत भिसी पाङ्सी भ्रबा, एनीगदे चा तिग्दा य्हो लसी भ्रबा? २२एनीगदेसे स्थान्दोगदेदा चा ब्रेल्सी भ्रबारी आत भिसी लोप्सी एनीगदे हाङनोन चा तिग्दा ब्रेल्सी भ्रबा? ओच्छे मूर्तिदा

तेन्बा ठीक आहिन भिसी स्थान्दोदा लोप्सी एनीगदे हाडनोन चा तिग्दा मन्दिरला धन सम्पत्ति य्हो लबा? २३डन्दा ठिम था मुला भिसी घमण्ड लबा म्हिसे तिग्दा ठिमरी मुबा ताम अन्छार आभ्रना परमेश्वरदा हेला लबा? २४तिग्दा भिसम बचनरी “एनी यहूदीगदेसे लमान अर्गु यहुलला म्हिगदेसे परमेश्वरला बिरोधरी ताम लसी भ्रबा मुला” भिसी भ्रिबा मुला। *

२५ठिम अन्छार भ्रजी भिसम एसे ल्हुइरी लबा खतना ठीक हिन्ना। तर थे ठिम अन्छार आभ्रनी भिसम एसे लबा खतना आलबा तेबान हिन्ना। २६चुदे खतना आलबा अर्गु यहुलला म्हिगदेसे थे ठिम अन्छार गे लजी भिसम परमेश्वरला डाच्छा थे खतना लबा म्हि हड्बान हिन्ना। २७ल्हुइरी खतना आलसैनोन थे ठिम अन्छार भ्रबा अर्गु यहुलला म्हिगदेसे एनी खतना लबादेन भ्रिबा ठिम मुसीनोन थे अन्छार आभ्रबा यहूदीगदेला दोष उन्ना। २८तिग्दा भिसम यहूदी तसी न्हजी भिदेमा पक्का यहूदी आदो। ओच्छे ल्हुइरी जे लबा खतनाएनोन पक्का खतना आत। २९तर जुन म्हिसे सेमहेन्सेन परमेश्वरदा तेन्ना थे म्हि चा पक्का यहूदी हिन्ना। ओच्छे सेमरी परमेश्वरला आत्मासे लबा खतना चा पक्का खतना हिन्ना। चु चा ठिमरी भ्रिबा अन्छार आहिन। चुहड्बा म्हिसे

म्हिगदेग्याम आहिन, परमेश्वरग्याम स्याबास याड्ला। *

३ थेहड् भिसम यहूदी तसी तिगै फाइदा आरे? ओच्छे खतना लसी तिगै याड्बा आरे? २जम्मान तामरी फाइदा मुला। तिग्दा भिसम परमेश्वरसे जम्मान भन्दा डाच्छा यहूदीगदेदा हाडला बचन जिम्मा पिन्बा मुबा। ३चुदे थेनीगदे न्हडला कोइ कोइसे परमेश्वरला बचनथोरी विश्वास लबारी आखम्नी भिदेमा तिग परमेश्वर विश्वास लबारी आखम्बा परमेश्वर हिन्ना? ४अहँ, आहिन। म्हि फट्टा तसैनोन परमेश्वर चा सत्य मुला। बचनरीनोन चुहड् भिसी भ्रिबा मुला, “हाडसे सुड्बा तामग्यामसेन हाड सत्य परमेश्वर हिन्ना भिसी म्हिगदेसे था याड्ला, ओच्छे निसाफ लबा धुइरी हाडसेन ढाला।” *

५तर चुदे यहाडसे लबा आज्यबा गेग्याम परमेश्वर ज्यबा मुला भिसी पाङ्मुला भिसम यहाडसे तिग पाङ्से? परमेश्वरसे यहाडदा आज्यबा गेला सजाय पिन्मा तिग परमेश्वरसे अन्याय लबा तला? डाइ म्हिसे म्हन्बा अन्छार पाङ्बा हिन्ना। ६चु ताम हिन्नोन आहिन, चुदे परमेश्वरदेन छ्याम निसाफ लबा अधिकार आरेबा हिन्सम खाहड् लसी परमेश्वरसे जम्बुलिडला निसाफ लबारी खम्ला?

७ चुदे डाइ पाङ्बा लुसीला तामग्याम परमेश्वरदा ल्हानान मान तला, ओच्छे परमेश्वर सत्य हिन्ना भिसी उन्ना भिसम तिग्दा परमेश्वरसे डादा भन पापी म्हिदा हङ् लसी निसाफ लबा? ८ ज्यबा तबारी पाप गे लसै तला भिबा ताम खाइमै ज्यबा तला? तसैनोन कोइ कोइ म्हिगदेसे यहाडसे चुहङ् पाङ्जी भिसी खिसी लसी दोष लबा मुला। चुहङ् लसी दोष लबा म्हिगदेदा चा ठीक सजाय पिन्ना।

पाप आलबा म्हि खालै आरे

९ दाहेन्से अर्गु यहलला म्हिगदे भन्दा यहाड यहूदीगदे चा परमेश्वरला डाच्छा ज्यबा म्हि हिन्ना? आहिन। यहूदीदेन अर्गु यहलला म्हिगदे जम्मान पापला तहरी मुला भिसी डाइ डाच्छान पाङ्सी जिन्बा मुला। १० बचनरीनोन चुहङ् भिसी भिबा मुला

“परमेश्वरसे म्हन्बा अन्छार भ्रबा म्हि खालै आरे,
गिकनोन आरे।* ११

घोबा म्हि खालै आरे,
ओच्छे परमेश्वरदा म्हाइबा म्हि एनोन खालै आरे।

१२ जम्मान म्हिसे परमेश्वरदा रूलाबा मुला,
गे खेल्बा म्हि गिकनोन आरे,

ओच्छे ज्यबा गे लबा म्हि एनोन गिकनोन आरे।

१३ थेनीगदेला ओल्गोड आल्हुबा धुर्सा हङ्बान मुला,
ओच्छे स्थान्दोदा फसब लबारी थेनीगदेला लेसे लुसीला ताम जे लमुला।

थेनीगदेला सुडरी चा पुख्रीला हङ्बान बिख मुला।*

१४ थेनीगदेला सुडसे के:बादेन आज्यबा ताम जे पाङ्मुला।*

१५ थेनीगदे म्हि साइबारी छ्यार्बा तमुला।*

१६ थेनीगदे भ्रबा ग्यामरी दुखदेन नाश जे तमुला।

१७ ओच्छे शान्तिला ग्यामदा थेनीगदेसे डोसेबान आरे।

१८ थेनीगदे परमेश्वर म्हाङ्सी आलोङ्मुला।”*

१९ परमेश्वरसे मोशादा पिन्बा ठिमरी भिबा ताम थे ठिमला तहरी चिबा म्हिगदेदा पाङ्बा ताम हिन्ना भिसी यहाडदा था मुला। थेतबासेलमा जम्बुलिङला जम्मान म्हिगदे परमेश्वरला डाच्छा राप्तो:ला। थे धुडरी खालैसेन तिगै पाङ्बारी आखम। २० तिग्दा भिसम थे ठिम अन्छार गे लसी खालैनोन परमेश्वरदा सेम निबा म्हि दोबारी आखम। ठिमसे चा म्हिसे लबा पाप उन्सी पिन्बा जे हिन्ना।*

३:१०-१२ भजन १४:१-३; ५३:१-३ ३:१३ भजन ५:६; १४०:३ ३:१४ भजन १०:७

३:१५-१७ यशै ५६:७-८ ३:१८ भजन ३६:१ ३:२० भजन १४३:२, गला २:१६

विश्वासग्यामसे जे परमेश्वरदा सेम निबा म्हि दोला

२१ तर दान्दे परमेश्वरसे म्हिदा खाहङ् लसी ह्वाङ्दा सेम निबा म्हि स्होमुला भिबा ताम य्हाङ्से म्हाङ्बा मुला। चु ताम ठिमदेन अगमवक्तागदेसेनोन पाङ्बा मुला। तर चु चा ठिम अन्छार गे लसी आहिन। २२ चुहङ् लसीन येशू ख्रीष्टदा विश्वास लबा जम्मान म्हिगदे विश्वासग्यामनोन परमेश्वरदा सेम निबा म्हि दोबा मुला। तिग्दा भिसम परमेश्वरला डाच्छा जम्मान म्हि गिकनोन हिन्ना।* २३ तिग्दा भिसम जम्मान म्हिगदेसे पाप लबा मुला, ओच्छे परमेश्वरला घेन य्हालग्याम थारेङ तबा मुला। २४ तर परमेश्वर चा दया लबा परमेश्वर हिन्ना, थेसे दयामाया लसी म्हिगदेदा तिगै आकिन्ना ओहङ्गनोन ह्वाङ्दा सेम निबा म्हि स्होबा मुला। तिग्दा भिसम ख्रीष्ट येशूसे जम्मान म्हिला लागिरी ह्वाङ्सेन सजाय नासी म्हिगदेदा पापला सजायग्याम फेबा मुला। २५ परमेश्वरसे ख्रीष्टदा य्हाङ्गला लागिरी बलि तबारी पुङ्खजी। ओच्छे ख्रीष्टसे बगब लबा का य्हाङ्गला लागिरी हिन्ना भिबा तामरी विश्वास लबा म्हिला पापला दोष मेटब लबा मुला। चुहङ् लसी

परमेश्वरसे ह्वाङ्से लबा निसाफ ठीक हिन्ना भिसी उन्बा मुला। तिग्दा भिसम ख्रीष्ट फेप्खबा भन्दा डाच्छा परमेश्वरसे नासी म्हिगदेला पापगदेदा तिगै वास्ता आलनी। २६ दान्देनोन ह्वाङ् ठीक मुला भिसी उन्बाला लागिरी परमेश्वरसे चुहङ् लजी। परमेश्वरसे ह्वाङ् ठीक निसाफ लबादेन येशूथोरी विश्वास लबा म्हिगदेग्याम स्थान्दो म्हिगदेदाएनोन ह्वाङ्दा सेम निबा म्हि स्होबारी खम्बा परमेश्वर हिन्ना भिसी उन्बाला लागिरी थेहङ् लबा हिन्ना।

२७ थेहङ् भिसम य्हाङ्से तिग तामला लागिरी घमण्ड लसे? घमण्ड लतो:बा तामनोन आरे। तिग्दा भिसम चु गे खजिबै ठिम अन्छार भ्रसी तबा आहिन। तर विश्वास लबासे लमान तबा हिन्ना। २८ थेतबासेलमा ठिम अन्छार गे लसी आहिन। तर विश्वास लसी जे परमेश्वरदा सेम निबा म्हि दोबारी खम्ला भिबा ताम य्हाङ्गला था मुला। २९ तिग परमेश्वर यहूदीगदेला जे परमेश्वर हिन्ना? तिग अर्गु यहूलला म्हिगदेला चा परमेश्वर आहिन? थे अर्गु यहूलला म्हिगदेलाएनोन परमेश्वर हिन्ना। ३० जम्मालान परमेश्वर गिकनोन हिन्ना। खतना लबा म्हि मुसै, खतना आलबा म्हि मुसै,† जम्मादान परमेश्वरसे थेनीगदेसे लबा

३:३० “खतना लबा म्हि” ओच्छे “खतना आलबा म्हि” भिबा चा यहूदी ओच्छे अर्गु यहूलला म्हिगदे हिन्ना।

३:२२ गला २:१६

विश्वासग्यामसेन परमेश्वरदा सेम निबा म्हि स्होबा हिन्ना।* ३१ चुदे य्हाङसे विश्वासग्याम परमेश्वरदा सेम निबा म्हि दोखम्ला भिसी पाङ्मा तिग परमेश्वरला ठिमदा चा नाश लबा हिन्ना? पक्कान आहिन, बरु य्हाङसे थे ठिमदा पूरा लबा मुला।

अब्राहामला विश्वास

४ दाहेन्से डन्ना म्हेमे अब्राहामसे तिग लोप्जी भिबा ताम खाहङ् लसी पाङ्से? २ चुदे अब्राहाम थेसे लबा गेग्याम परमेश्वरदा सेम निबा म्हि दोबा हिन्सम घमण्ड लम्याङ्सेला मुबा। तर परमेश्वरला डाच्छा चा आहिन। ३ तिगदा भिसम परमेश्वरला बचनरी चुहङ् लसी भिबा मुला, “अब्राहामसे परमेश्वरदा विश्वास लजी। थेतबासेलमा परमेश्वरसे अब्राहामदा हाङदा सेम निबा म्हि हिन्ना भिसी सुङ्जी।”* ४ च्यागो, खालै म्हिसे गे लसी याङ्बा ज्याला चा दान आहिन, तर थे थेसे याङ्तो:बा ज्याला हिन्ना। ५ जुन म्हिसे गेथोरी भर आलना पाप माफ लसी परमेश्वरदा सेम निबा म्हि स्होबा परमेश्वरदा विश्वास लला, थेहङ्बा म्हिदा विश्वासग्यामसेन परमेश्वरसे हाङदा सेम निबा म्हि हिन्ना भिसी सुङ्ला। ६ गेग्याम आहिन, तर विश्वासग्याम परमेश्वरदा सेम निबा म्हि दोबा

म्हिगदेदा दाऊद ग्लेसे परमेश्वरला बचनरी चुहङ् भिसी पाङ्बा मुला।

७ “थेनीगदेसे परमेश्वरग्याम गाते मोलम याङ्ला, थेनीगदेसे आज्यबा गे लसैनोन परमेश्वरसे थेनीगदेदा माफ लबा मुला। ओच्छे थेनीगदेला पापला दोष एनोन मेटब लसी पिन्बा मुला।

८ थेनीगदेसे परमेश्वरग्याम गाते मोलम याङ्ला, थेनीगदेसे लबा पापला दोष परमेश्वरसे मेटब लसी जिन्बा मुला।”*

९ दाऊदसे पाङ्बा चु मोलम खतना लबा यहूदीगदेला लागिरी जे हिन्ना? आहिन। तर खतना आलबा अर्गु य्हुलला म्हिगदेला लागिरीनोन हिन्ना। तिगदा भिसम अब्राहामसे परमेश्वरदा विश्वास लबासे लमा परमेश्वरसे थेदा हाङदा सेम निबा म्हि हिन्ना भिसी सुङ्जी भिबा ताम य्हाङसे पाङ्मुला। १० अब्राहामदा परमेश्वरसे खाङ्मा तिगै दोष आरेबा म्हि हिन्ना भिसी सुङ्जी? थेसे ठिम अन्छार खतना लबा भन्दा डाच्छा कि लिच्छा? तर खतना लबा भन्दा डाच्छान सुङ्बा हिन्ना। ११ लिच्छा अब्राहामला खतना लजी, ओच्छे चु चा थेसे लबा विश्वाससे लमा खतना तबा भन्दा डाच्छान परमेश्वरसे थेदा हाङदा सेम निबा म्हि

भिसी सुड्बाला चिनु हिन्ना। ओच्छे खतना आलसैनोन विश्वासग्याम परमेश्वरसे हाडदा सेम निबा म्हि भिसी सुड्बा जम्मान म्हिगदेला थे आबा दोगै भिसी चुहङ् लसी हिन्ना।* १२थेहङ् लसी यहूदीगदे खतना लबासे लमा आहिन, तर थेनीगदेसेनोन अब्राहामसे हङ् लसीन खतना लबा भन्दा डाच्छा विश्वास लसी भ्रबासे लमान अब्राहाम थेनीगदेलाएनोन आबा दोजी।

विश्वासग्यामसे जे कबुल लबा स्हे याङ्ला

१३अब्राहामदेन थेला सन्तानगदेदा जम्बुलिङला हक पिन्ना भिसी लबा कबुल चा थेसे ठिम अन्छार गे लबासे लमा आहिन। तर थेसे लबा विश्वासग्याम परमेश्वरदा सेम निबा म्हि दोबासे लमा हिन्ना।* १४चुदे ठिम अन्छार भ्रबा म्हिगदेसे थे हक याङ्बा हिन्सम म्हिगदेसे लबा विश्वास गे आखेलबा तसेला मुबा। ओच्छे परमेश्वरसे पिन्ना भिसी लबा कबुलएनोन गे आखेलबा तसेला मुबा।* १५तिग्दा भिसम ठिम अन्छार आभ्रमा परमेश्वरसे म्हिगदेदा सजाय पिन्ना। तर ठिमनोन आरेमाहेन्से थेरी आज्यबा गेनोन आत।

१६परमेश्वरसे लबा दयामायाथोरी भर लगै भिसी थेसे लबा कबुल

विश्वासग्यामसे जे याङ्ला। चुनोन दयामायाग्यामसे अब्राहामला जम्मान सन्तानसे परमेश्वरसे लबा कबुल याङ्ला भिसी पक्का लबा मुला। चु कबुल ठिम मुबागदेला लागिरी जे आहिन, तर अब्राहामसे हङ्बान विश्वास लबा म्हिगदेला लागिरीनोन हिन्ना। तिग्दा भिसम अब्राहाम यहाङ जम्मालान आबा हिन्ना।* १७परमेश्वरसे अब्राहामदा सुड्बा ताम बचनरी चुहङ् लसी भ्रिबा मुला, “डाइ एदा जम्मान यहुलला म्हिगदेला आबा स्होबा मुला।” तिग्दा भिसम परमेश्वरला डाच्छा अब्राहाम यहाङ जम्मालान आबा हिन्ना। सिबागदेदा सोना लबादेन आरेबा स्हेदा बचनग्यामसेन स्होबा परमेश्वरदा अब्राहामसे विश्वास लजी।*

१८कोला तला भिसी आशनोन आरेबा धुइरी परमेश्वरसे “एला कोलागदे मुला सार हङ्नोन भयासीन भयाआखम्बाधोना तला” भिसी सुड्बा तामरी आश लसी विश्वास लजी। चुहङ् लसी थे ल्हानान यहुलला म्हिगदेला आबा दोजी।* १९अब्राहाम ओस्पन ग्यार्जा गिक दिङ तसी जिन्बा मुबा। हाङ खेप्बा दोसी सिङ लबा धुइ तजी भिबा तामदेन हाङ्ला मिङ साराग्याम कोला आत भिबा ताम था याङ्सीनोन थेला विश्वास कमजोर

आतनी।* २० परमेश्वरसे पिन्ना भिसी कबुल लबा तामरी थेसे तिगै शङ्का आलना विश्वासरी भन कोङ्सी चिजी, ओच्छे चुनोन विश्वासग्याम थेसे परमेश्वरदा मानदेन जयजयकार लजी। २१ परमेश्वरसे लबा कबुल पूरा लखम्ला भिबा ताम अब्राहामदा पक्का था मुबा। २२ चुहङ्बा विश्वाससे लमान परमेश्वरसे अब्राहामदा “हाङ्दा सेम निबा म्हि हिन्ना” भिसी सुङ्जी। २३ “परमेश्वरदा सेम निबा म्हि हिन्ना” भिसी सुङ्बा ताम चा अब्राहामला लागिरी जे भिबा आहिन, २४ तर यहाङला लागिरीनोन भिबा हिन्ना। यहाङ न्हङला जुन म्हिसे यहाङला प्रभु येशूदा सिबाग्याम सोना लबा परमेश्वरदा विश्वास लला, थेनीगदेदाएनोन परमेश्वरसे हाङ्दा सेम निबा म्हि हिन्ना भिसी सुङ्गला। २५ यहाङला पापला दोष मेटब लबाला लागिरी येशूदा साङ्जी, ओच्छे यहाङदा परमेश्वरदा सेम निबा म्हि हिन्ना भिसी म्हन्बाला लागिरी थेदा सिबाग्याम सोना लजी।*

विश्वासग्याम याङ्बा शान्ति

५ थेतबासेलमा यहाङला विश्वास-ग्यामसेन यहाङदा परमेश्वरदा सेम निबा म्हि दोना लबा मुला। ओच्छे यहाङला प्रभु येशू ख्रीष्टग्यामसेन यहाङ परमेश्वरदेन छ्याम ढिक्का मुला।

२ ख्रीष्टसे यहाङला विश्वासग्याम यहाङदा परमेश्वरला दयामायारी भबा मुला। ओच्छे दान्दे यहाङ थेनोन दयामायारी भ्रबा मुला। यहाङदा परमेश्वरसे थेला हङ्बान यहालदेन शक्ति पिन्ना भिसी घेन आश थोसी यहाङ ताङ्बा मुला। ३ चुदे जे आहिन, दुखरीनोन यहाङ ताङ्बा मुला। तिगदा भिसम यहाङसे दुख नाजी भिसम अफन यहाङ विश्वासरी पाको म्हि दोला। ४ दुख नाखम्बा शक्तिसे यहाङदा पाको म्हि स्होला। यहाङ पाको म्हि तमाहेन्से यहाङदा आश खमुला। ५ यहाङसे लबा चु आशसे यहाङदा दुख ड्हम्ना आल। तिगदा भिसम यहाङदा परमेश्वरसे हाङला आत्मा पिन्बा मुला, ओच्छे थेनोन आत्मासे यहाङला सेमरी परमेश्वरला माया थान्सी पिन्बा मुला।

६ यहाङसे थार्बा याङ्बाला लागिरी तिगैनोन लबारी आखम्बा धुङ्गरी ख्रीष्ट यहाङ पापीगदेला लागिरी परमेश्वरसे तोगब लबा धुङ्गरी सिजी। ७ धर्म तेन्बा म्हिला लागिरी खालै म्हि चुहङ् लसी आसि। तर ज्यबा गे लबा म्हिला लागिरी खालै म्हिसे सिबारी म्हाङ्गला तला। ८ तर यहाङ पापी तसैनोन ख्रीष्ट यहाङला लागिरी सिसी यहाङदा परमेश्वरसे हाङला माया उन्जी।

९ दाहेन्से ख्रीष्ट सिसी हाङलान काग्याम यहाङदा परमेश्वरदा सेम

निबा म्हि दोना लजी। चुदे जे आहिन, परमेश्वरग्याम यहाडसे नातो:बा सजायग्यामसेनोन यहाडदा जोगब लला। १० यहाड परमेश्वरला शत्रु मुबा धुइरीन थेला भा ख्रीष्ट सिसी यहाडदा परमेश्वरदेन छ्याम ढिकना लजी। यहाडदा परमेश्वरदेन छ्याम ढिकना लबा जे आहिन, तर दाहेन्से भन प्रभु येशू ख्रीष्टला लहुङ्ग्यामसे यहाडदा थानाएनोन लला। ११ चुदे जे आहिन, तर दाहेन्से प्रभु येशू ख्रीष्टसे यहाडदा परमेश्वरदेन छ्याम ढिकना लसी ह्राडला हो स्होबासे लमा यहाड परमेश्वरदेन छ्याम गिक तसी ताड्बा मुला।

आदमदेन ख्रीष्ट

१२ जम्मान भन्दा डाच्छा आदम भिबा म्हि गिकग्याम जम्बुलिङरी पाप खजी, ओच्छे पापग्याम काल खजी। चुहङ् लसीन जम्मान म्हिगदेसे पाप लबासे लमा जम्मानथोरी काल खजी। * १३ परमेश्वरसे मोशादा ठिम पिन्बा भन्दा डाच्छाहेन्सेन जम्बुलिङरी पाप मुबा। तर ठिम आरेबासे लमा पापला हिसाब आरेमुबा। १४ तसैनोन आदमला धुइहेन्से मोशा भिबा म्हिला धुइधोनाला जम्मान म्हिगदेदा कालसे शासन लजी। थे म्हिगदेसे लबा पाप आदमसे लबा पाप हङ्बा आतसै थेनीगदे सितो:जी। आदमसे लबा

गेग्याम जम्मान म्हि सिजी, ओच्छे ख्रीष्टसे लबा गेग्याम चा जम्मान म्हि सोजी।

चुहङ् लसी च्यामा, आदम लिच्छा फेप्खबा ख्रीष्ट हङ्बान मुबा। १५ तर पापला सय फाबारी परमेश्वरसे यहाडदा पिन्बा मोलमदेन आदमसे लबा पाप ल्हानान फरक मुला। तिगदा भिसम म्हि गिकसे लबा पापग्याम ल्हानान म्हिगदे सिजी। तर लिच्छा फेप्खबा येशू ख्रीष्टसे चा परमेश्वरला ल्हानान घेन दयामायाग्याम म्हिसे फातो:बा पापला सय फासी ल्हानान म्हिगदेदा सोना लजी।

१६ थेहङ् लसीन परमेश्वरसे ओहङ्गोनोन पिन्बा मोलम चा म्हि गिकसे लबा पाप भन्दा फरक मुला। म्हि गिकसे पाप लबासे लमा जम्मान म्हिगदेदा दोषी भिसी पाङ्जी, ओच्छे सजाय नातो:जी। तर ल्हानान पाप लमाहेन्से लिच्छा फेप्खबा ओहङ्गोनोन याड्बा मोलमग्याम परमेश्वरसे म्हिगदेला पापला दोष मेटब लसी ह्राडदा सेम निबा म्हि भिसी सुङ्जी। १७ म्हि गिकसे पाप लबासे लमा जम्मान म्हिगदेथोरी कालसे शासन लजी। तर परमेश्वरसे ल्हानान दयामाया लसी म्हि गिक येशू ख्रीष्टग्याम ओहङ्गोनोन पिन्बा मोलमग्याम यहाडदा परमेश्वरदा सेम निबा म्हि हिन्ना भिसी सुङ्जी। थे

मोलम याङ्बा म्हिगदे येशू ख्रीष्टग्याम सोला ओच्छे शासन लला।

१८थेतबासेलमा म्हि गिकसे लबा पापग्यामसे जम्मान म्हिगदेसे सजाय नातो:जी, थेहङ् लसीन म्हि गिकसे लबा ज्यबा गेग्यामसेन जम्मान म्हिगदे परमेश्वरदा सेम निबा म्हि दोसी जुकजुकधोनाला जुनी याङ्बारी खम्ला। १९म्हि गिकसे परमेश्वरसे कुल्बा ताम आङ्यान्बासे लमा ल्हानान म्हिगदे पापी दोजी। थेहङ् लसीन म्हि गिकसे परमेश्वरसे कुल्बा ताम ड्यान्बासे लमा ल्हानान म्हि परमेश्वरदा सेम निबा म्हि दोजी। २०जम्मान म्हिगदेसे गाते पाप लबा चीम भिसी था याङ्गै भिसी परमेश्वरसे ठिम पिन्जी। तर जति पाप बढब तबान निजी परमेश्वरसे भन ल्हानान दयामाया लजी। २१थे धुइरी पापसे कालग्याम म्हिगदेदा शासन लबा हङ् लसी दान्दे परमेश्वरला दयामायासे शासन लबान मुला। थे दयामायासे य्हाङ्दा परमेश्वरदा सेम निबा म्हि स्होसी य्हाङला प्रभु येशू ख्रीष्टग्याम जुकजुकधोनाला जुनी पिन्बान मुला।

पापग्याम सिला ख्रीष्टग्याम सोला

६ दाहेन्से य्हाङसे तिग पाङ्से? तिग परमेश्वरग्याम ल्हानान दयामाया याङ्गै भिसी अक्क य्हाङ पापनोन लसी चिसे? २आहिन, खाइमै

चुहङ् लबारी आत। चुदे य्हाङ पापला शक्तिग्याम फेसी जिन्जी भिसम तिगदा य्हाङ दो:सी पापला तहरी चिबा सेम लबा? ३य्हाङ ख्रीष्ट येशूदेन छ्याम गिक तबारी बप्तिस्मा किन्जी। य्हाङसे किन्बा बप्तिस्मा चा ख्रीष्टदेन छ्याम गिक तसी सिबाला चिनु हिन्ना भिबा ताम एनीगदेदा थानोन मुला। ४थेतबासेलमा य्हाङएनोन ख्रीष्टदेन छ्यामनोन बप्तिस्माग्याम सिसी ल्हुजी। ओच्छे य्हाङ छार बानीबेहोर थोसी भ्रबाला लागिरी शक्तिशाली परमेश्वर आबासे हाङला शक्तिग्याम येशू ख्रीष्टदा सिबाग्याम सोना लजी।*

५चुदे य्हाङ ख्रीष्टदेन छ्याम गिक तसी सिजी भिसम य्हाङएनोन थे हङ् लसीन सिबाग्याम सोला। ६य्हाङला पापसे प्लिङ्बा ल्हुइ नाश तगै भिसी डाच्छाला बानीबेहोरदा ख्रीष्टदेन छ्यामनोन कुसरी साइबा मुला। चुहङ् लबा चा दाहेन्से य्हाङ पापला तहरी चिआतो:गै भिसी हिन्ना भिबा ताम य्हाङदा थानोन मुला। ७तिगदा भिसम जुन म्हि सिबा मुला थे म्हि थेला पापला सजायग्याम पूरान फेसी जिन्बा मुला।

८ख्रीष्टदेन छ्याम सिजी भिसम ख्रीष्टदेन छ्यामनोन सोला भिसी य्हाङसे विश्वास लबा मुला। ९तिगदा भिसम य्हाङदा थानोन मुला, ख्रीष्ट सिसीनोन सोसी जिन्बा मुला। दाहेन्से थे खाइमै आसि, ओच्छे थेदा कालला

शक्तिसेनोन तिगै लबारी आखम।
 १० पूरान पापला दोष मेटब लबाला
 लागिरी ख्रीष्ट तिरैम सिंसी जिन्बासे
 लमा पापला सय फासी जिन्जी।
 ओच्छे परमेश्वरला लागिरीन थे
 सदनना लागिरी सोबा मुला। ११ थेहड्
 लसीन एनीगदेसेनोन हाड हाडला
 पापला शक्तिला लागिरी सिंजी भिंसी
 म्हन्तो:मुला। तर ख्रीष्ट येसूग्याम
 परमेश्वरला लागिरी सोबा मुला भिंसी
 म्हन्तो:मुला।

१२ थेतबासेलमा एनीगदेला पापी
 सेमसे जुन लइ म्हन्बा थे अन्छार
 लआतो:गै भिंसी एनीगदेसे हाडला
 सिंसी निबा लहुइरी पापदा शासन
 लबारी थापिन्गो। १३ ओच्छे आज्यबा
 गे लबारी हाडला या काड पापदा
 जिम्मा थापिन्गो। तर सिबाग्याम सोबा
 म्हिगदेसे हड् लसी हाडला पूरान लहुइ
 परमेश्वरदा पिन्गो, ओच्छे परमेश्वरदा
 सेम निबा गे लबाला लागिरी हाडला
 या काड परमेश्वरदान जिम्मा
 लसी पिन्गो। १४ तिगदा भिसम पाप
 एनीगदेथोरी शासन लबा एनीगदेला
 मालिक आहिन, दाहेन्से एनीगदे
 ठिमला तहरी आरे, तर परमेश्वरला
 दयामायाला तहरी मुला।

परमेश्वरदा सेम निबा गे लबा म्हि

१५ यहाड ठिमला तहरी आरे, तर
 परमेश्वरला दयामायाला तहरी मुला
 भिदेमा तिग यहाड पापनोन लसी
 चिसे? आहिन, चुहड् खाइमै लबारी

आत। १६ जुन्ना ताम ड्यान्सी गे
 लबा सेम लला एनीगदे थेलान नोकर
 दोला। चुदे पापला नोकर दोसी थेसे
 कुल्बा अन्छार भ्रजी भिसम ए सिला,
 तर परमेश्वरसे कुल्बा अन्छार भ्रजी
 भिसम ए थेदा सेम निबा म्हि दोला।
 १७ डाच्छा एनीगदे पापला नोकर दोबा
 मुबा। तर दान्दे एनीगदेसे सेमहेन्सेन
 परमेश्वरला बारेरी लोप्बा ताम अन्छार
 भ्रबा मुला। चुला लागिरी परमेश्वरदा
 धन्यवाद तगै। १८ एनीगदे पापग्याम
 फेबा मुला, ओच्छे परमेश्वरसे म्हन्बा
 अन्छार भ्रबा म्हि दोबा मुला।

१९ घोबारी आखम्बा एनीगदेला
 बानीबेहोरसे लमा डाइ एनीगदेसे
 घोबारी खम्बा ग्योइरी पाड्बान मुला।
 तिरैम आज्यबा सेम थोसी पापथोरी
 पाप लबाला लागिरी एनीगदेसे
 हाडला लहुइ पापदा जिम्मा पिन्बा
 मुबा। दाहेन्से परमेश्वरसे म्हन्बा
 अन्छार भ्रबा म्हि दोबारी एनीगदेसे
 हाडला लहुइ परमेश्वरदा जिम्मा
 पिन्गो। २० पापला नोकर दोबा धुइरी
 एनीगदे परमेश्वरसे म्हन्बा अन्छार
 भ्रआतो:मुबा। २१ थे धुइरी लबा गेगदे
 ढन्सी एनीगदे दान्दे पे:मुला, थेहड्बा
 गेग्याम एनीगदेसे तिग याड्जी? थे
 जम्मान आज्यबा गेसे चा म्हिदा सिना
 लमुला। २२ दाहेन्से एनीगदेसे पापग्याम
 थार्बा याड्बा मुला, ओच्छे परमेश्वरदा
 तेन्सी तिगै दोष आरेबा म्हि दोबा मुला।
 चुग्याम एनीगदेसे जुकजुकधोनाला
 जुनी याड्ला। २३ तिगदा भिसम पापसे

पिन्बा ज्याला चा काल हिन्ना, तर परमेश्वरसे ओह्ङ्ङनोन पिन्बा मोलम चा य्हाडला प्रभु येशू ख्रीष्टग्याम याड्बा जुकजुकधोनाला जुनी हिन्ना।

ठिमग्याम फेबा

७ ज्योज्यो आले नाना आडागदे, चु ताम डाइ ठिम सेबा घोबा म्हिगदेदा पाड्बान मुला। म्हि सोतेधोना जे ठिमला तहरी तमुला भिबा ताम एनीगदेदाएनोन थानोन मुला। ^२सोतेधोना ब्याह लबा बारेला ठिमला तहरी चिबा चा, ब्याह लबा म्रिडम्हेमे ह्वाडला हेम्बो सोतेधोना हेम्बोला तहरी चिबा ह्ङ्ङबा हिन्ना। तर चुदे थेला हेम्बो सिजी भिसम थे हेम्बोला तहरी आचि। ^३चुदे ह्वाडला हेम्बो मुना मुनान थेसे स्थान्दो हेम्फेबेदेन छ्याम ब्याह लजी भिसम ब्रेल्सी भ्रबा हिन्ना। तर थेला हेम्बो सिजी भिसम थे, थे ठिमग्याम फेबा मुला, ओच्छे स्थान्दो हेम्फेबेदेन छ्याम ब्याह लसैनोन ब्रेल्सी भ्रबा आहिन।

^४थेह्ङ्ङ लसीन डाला ज्योज्यो आले नाना आडागदे, एनीगदेएनोन ख्रीष्टला ल्हुङ्ग्याम ठिमला लागिरी सिसी जिन्बा मुला। थेतबासेलमा परमेश्वरला लागिरी ज्यबा गे लबारी खमौ भिसी य्हाड सिबाग्याम सोबा ख्रीष्टदेन छ्याम गिक तबा मुला।

^५य्हाड डाच्छा पापी बानीबेहोर अन्छार भ्रमुबा। थे धुइरी ठिमसे य्हाडला पापी सेमदा थीसी य्हाडदा ल्हानान पाप गेगदे लपुङ्गी। थेनोन गेसे य्हाडथोरी काल भजी। ^६थेह्ङ्ङबा ठिमला लागिरी य्हाड सिसी जिन्जी। चु भिबा चा य्हाड थे ठिमग्याम फेसी जिन्बा मुला भिबा हिन्ना। थेतबासेलमा दाहेन्से य्हाड डाच्छा भ्रिबा ठिमला तहरी चिसी आहिन, तर परमेश्वरला आत्मासे पिन्बा छार जुनीग्याम तेन्बा मुला।

ठिमदेन पाप

^७थेह्ङ्ङ भिसम तिग य्हाडसे ठिमनोन पाप हिन्ना भिसी पाड्बारी तला? पक्कान आत। तर चुदे ठिम आरेबा हिन्सम पाप भिबा डादा थानोन आतसेला मुबा। तिगदा भिसम “एसे लोभ थालउ” भिसी ठिमसे आपाड्बा हिन्सम लोभ लबा चा पाप हिन्ना भिसी डाइ था आयाड्सेला मुबा। ^{*}तर पापसे ठिमरी कुल्बा तामग्याम मौका किन्सी डाला सेमरी ल्हानान थरीला लोभ खना लजी। तिगदा भिसम ठिम आरेसम पाप खाइमै आरेबा तेबान हिन्ना। ^६डाच्छा ठिम था आरेबा धुइरी डा सोबा मुबा। तर ठिम था याड्माहेन्से डा पापग्याम सिबा तेबान तजी ओच्छे पाप चा सोजी। ^{१०}ओच्छे जुनी पिन्ना भिसी कबुल

लबा थे ठिमसे मी डादा सिना लजी।
 ११तिगदा भिसम पापसे थे ठिमसे
 कुल्बा तामग्यामसेन मौका किन्सी
 डादा छल लसी साइबा हड्बान
 हिन्ना।* १२तसैनोन ठिमदेन ठिमसे
 कुल्बा ताम चा तिगै दोष आरेबादेन
 ठीक ओच्छे ज्यबा मुला।

१३ज्यबा मुला भिबा ठिमसेन डादा
 साइबा हिन्ना? पक्कान आहिन।
 ठिमरी मुबा ज्यबा तामग्याम डादा
 साइबा पापनोन हिन्ना। थेतबासेलमा
 ठिम अन्छार पाप गाते लोड्बा खबा
 मुला भिबा ताम यहाडदा था मुला।

ख्रीष्ट आरेसम यहाड पापदेन छ्याम भ्रेःला

१४ठिम स्वर्गग्याम खबा ज्यबा
 ताम हिन्ना भिबा यहाडदा था मुला।
 तर डाएनोन पापला तहरी चिबा
 जम्बुलिडला म्हि हिन्ना। १५डाइ तिग
 लबान मुला थे डादान था आरे। तिगदा
 भिसम जुन गे डाइ लबारी म्हाइला
 थे आलमुला। तर जुन गे डादा सेम
 आनिमुला थेनोन गे डाइ लमुला।*
 १६चुहड् लसीन लबारी आम्हाइबा गे
 डाइ लमुला भिसम ठिम ज्यबा मुला
 भिबा तामरी डादा विश्वास मुला।
 १७थेतबासेलमा डाइ लबा आज्यबा
 गे डा हाडसेन लबा आहिन। तर डा
 न्हडरी चिबा पापसे लबा हिन्ना।
 १८तिगदा भिसम डा जम्बुलिडलान

म्हि तबासे लमा डा न्हडरी तिगै ज्यबा
 ताम आरे, थेहड् तबा चा डा न्हडरी
 मुबा जम्मान पापी बानीबेहोरसे हिन्ना
 भिसी डादा था मुला। थेतबासेलमा
 जुन गे ज्यबा मुला, थे गे डाइ लबारी
 म्हाइसैनोन लबारी आखम्मुला।
 १९तिगदा भिसम जुन गे ज्यबा भिसी
 डाइ लबारी म्हाइजी थे लबारी
 आखम्मुला। तर जुन गे आज्यबा भिसी
 डाइ लबारी आम्हाइनी थे गे लमुला।
 २०जुन गे डादा सेम आनिमुला थेनोन
 गे डाइ लमुला भिसम थे गे लबा डा
 हाडनोन आहिन। तर डा न्हडरी चिबा
 पाप हिन्ना।

२१थेतबासेलमा ज्यबा गे लबारी
 म्हाइना म्हाइनान डाग्याम आज्यबा गे
 जे तमुला। डाला ल्हुडरी गे लबा चा
 आज्यबा गे लबा ठिम हिन्ना भिसी डाइ
 था याड्बा मुला। २२तिगदा भिसम डाला
 सेम चा परमेश्वरला ठिमग्यामसेन
 ताड्मुला। २३तर डादा चा डा न्हडरी
 मुबा अर्गुन ठिमसे गे लपुड्मुला भिसी
 डाइ म्हाड्बा मुला। चु शक्तिसे चा
 परमेश्वरदा ताड्ना लबारी म्हाइबा
 डाला सेमदा बिरोध लमुला। चुसेन
 डादा पापला नोकर स्होसी डाथोरी
 शासन लमुला। २४-२५डा गाते ल्हाना
 दुख याड्बा म्हि, पापदेन कालला
 शक्तिला तहरी मुबा चु ल्हुड्ग्याम डादा
 खाल्से फेला? थेतबासेलमा डाइ
 सेमहेन्सेन परमेश्वरला ठिमदा तेन्बारी

म्हाइमुला, तर डाला पापी बानीबेहोरसे चा पापदान तेन्पुङ्मुला। डा खाहङ्बा ताङ्आखम्बा म्हि, पापदेन कालला शक्तिला तहरी मुबा चु ल्हुङ्ग्याम डादा खाल्से फेला? परमेश्वरदा धन्यवाद तगै। येशू ख्रीष्ट य्हाङला प्रभुसेन चुङ्ग्याम य्हाङदा फेला।

परमेश्वरला आत्माङ्याम याङ्बा जुनी

८ थेतबासेलमा दाहेन्से ख्रीष्ट येशूदेन छ्याम गिक तबा म्हिगदेदा परमेश्वरसे सजाय आपिन। २तिगदा भिसम ख्रीष्ट येशूङ्याम जुनी पिन्बा परमेश्वरला आत्मांला शक्तिसे य्हाङदा पापदेन सिबाला शक्तिङ्याम थार्ना लबा मुला। ३म्हिला हाङलान पापी बानीबेहोरसे ठिमदा कमजोर तना लबासे लमा ठिमसे लबारी आखम्बा गे परमेश्वरसे लजी। परमेश्वरसे हाङलान भादा पापी म्हिला हङ्बान ल्हुङ्गरी पुङ्खसी म्हिला पापला लागिरी बलि तपुङ्जी। ओच्छे थेलान ल्हुङ्ग्याम पापला शक्तिदा नाश लजी। ४चुहङ् लसी पापी बानीबेहोर अन्छार भ्रबारी आहिन, तर परमेश्वरला आत्मासे कुल्बा अन्छार भ्रबा म्हि य्हाङ्ग्याम परमेश्वरसे ठिमसे म्हन्बा ताम पूरा तबा मुला।

५तिगदा भिसम पापी बानीबेहोर अन्छार भ्रबा म्हिगदेला सेम पापी

बानीबेहोरदा सेम निबा तामरी तमुला। तर परमेश्वरला आत्मासे कुल्बा अन्छार भ्रबा म्हिगदेला सेम परमेश्वरला आत्मादा सेम निबा तामरी तमुला। ६पापी बानीबेहोर अन्छार जे भ्रबा सेम लबा म्हि चा सिबा म्हि हङ्बान हिन्ना। तर परमेश्वरला आत्मासे म्हन्बा अन्छार भ्रबा सेम लबा म्हिसे चा शान्तिदेन जुनी याङ्ला। ७पापी सेमला तहरी चिबा म्हिगदे परमेश्वरला शत्रु हिन्ना। तिगदा भिसम थेनीगदे परमेश्वरला ठिम अन्छार भ्रएनोन आभ्र ओच्छे भ्रबारीएनोन आखम। ८पापी सेमला तहरी चिबा म्हिगदेसे परमेश्वरदा ताङ्ना लबारी आखम।

९चुदे एनीगदे न्हङरी परमेश्वरला आत्मा धन्छ्याजी भिसम एनीगदे पापी बानीबेहोररी आहिन, तर परमेश्वरला आत्मांरी तला। तर खालै म्हिदेन छ्याम ख्रीष्टला आत्मा[†] आरेसम थे ख्रीष्टला म्हि तनोन आखम। १०चुदे ख्रीष्ट एनीगदे न्हङरी धन्छ्याजी भिसम पापसे लमा एनीगदेला ल्हुङ्गिसी निसैनोन एनीगदे परमेश्वरदा सेम निबा म्हि दोबासे लमा एनीगदेला आत्मा चा सोला। ११परमेश्वरसे हाङला आत्मासे ख्रीष्ट येशूदा सिबाङ्याम दोःसी ल्हुङ्गरीन सोना लजी। थेनोन परमेश्वरला आत्मा एनीगदे न्हङरी धन्छ्याजी भिसम

८:६ चु पदरी परमेश्वरला आत्मादेन ख्रीष्टला आत्मा भिबा गिकनोन हिन्ना।

एनीगदेला सिसी निबा लहुइदाएनोन
थेसे सोना लला।*

१२थेतबासेलमा ज्योज्यो आले नाना
आडागदे, यहाडसे लतोःबा गे मी
ल्हानान मुला, तर चु गेगदे यहाडला
पापी बानीबेहोरला तहरी चिसी लबा
आहिन। १३तिग्दा भिसम एनीगदे
हाडलान पापी बानीबेहोरला तहरी
चिजी भिसम एनीगदे सितोःला। तर
चुदे परमेश्वरला आत्माला शक्तिग्याम
थे पापी बानीबेहोरदा नाश लजी
भिसम एनीगदे सोला। १४तिग्दा
भिसम परमेश्वरला आत्मासे उन्बा
ग्यामरी भ्रबा म्हिगदे जे परमेश्वरला
कोलागदे हिन्ना। १५तिग्दा भिसम
परमेश्वरसे एनीगदेदा थेला नोकर
स्होसी लोङ्ना लबा आत्मा पिन्बा
आहिन, तर परमेश्वरसे एनीगदेदा
थेला हाडलान कोलागदे दोबा आत्मा
पिन्बा मुला। थे आत्माग्यामसे यहाडसे
थेदा “आबा” भिसी पाङ्मुला।*
१६यहाड परमेश्वरला कोलागदे हिन्ना
भिसी परमेश्वरला आत्मासे यहाडला
आत्मादा घोना लबा मुला। १७यहाड
परमेश्वरला कोलागदे हिन्सम यहाड
परमेश्वरला हक याङ्बा म्हि हिन्ना।
ओच्छे चु हक ख्रीष्टदेन छ्याम तसी
याङ्गला। तर थेहङ् लसीन ख्रीष्टसे
नाबा दुख यहाडसेनोन नाजी भिसम
ख्रीष्टसे याङ्बा मान यहाडसेनोन
याङ्गला।

लिच्छा याङ्बा मान

१८तिग्दा भिसम यहाडसे लिच्छा
याङ्बा सुखदेन घेन मान दान्दे
यहाडसे नाबा दुखदेन छ्याम
दाँजब लबारी आखम भिबा ताम
डादा था मुला। १९पाङ्गनोन तोःमा,
परमेश्वरसे हाडला कोलागदे उन्बा
धिन च्याबारी परमेश्वरसे स्होबा
जम्मान स्हेसे सेम लसी थे धिन
भ्रान्सी चिबा मुला। २०तिग्दा भिसम
जम्मान स्हे गे आखेल्बा तबा मुला,
थेनीगदेसे म्हन्बा अन्धार चुहङ् तबा
आहिन। तर परमेश्वरसेन थेनीगदेदा
थार्ना लबा धिनना आश लसी
चुहङ् लबा हिन्ना। २१तिग्दा भिसम
परमेश्वरसे स्होबा स्हेगदेदाएनोन
तिरेकुनु नाश तबाला याग्याम फेला,
ओच्छे थेनीगदेसेनोन परमेश्वरला
कोलागदेसे याङ्बा हङ्बान घेन
थार्बा याङ्गला।

२२थेनीगदे जम्मासेन कोला न्हबा
बेथा याङ्बा म्रिडम्हेमेगदेसे दुख
नाबा हङ् लसी दान्देधोना दुख नासी
चिबा मुला भिबा ताम यहाडदा था
मुला। २३थेनीगदे जे आहिन, तर
परमेश्वरला आत्मा याङ्बा म्हिगदे
यहाडएनोन परमेश्वरला कोलागदे
दोबादेन लहुइ पूरान पापग्याम
फेबाला लागिरी सेमरी दुख नासी
परमेश्वरला ग्याम च्यासी चिबा

मुला। * २४ तिग्दा भिसम य्हाड चुनोन आशग्याम थाबा मुला। आश लबा भिबा चा य्हाडसे तिगै स्हे याड्बाला लागिरी भ्रान्सी चिबा हिन्ना। डाच्छा याड्सी जिन्बा स्हेला लागिरी खालैसेन आश आल। २५ तर चुदे य्हाडसे आम्राड्बा स्हेला लागिरी आश लबा हिन्सम थे आयाड्तेधोना दुख नासी भ्रान्सी चितोःला।

२६ य्हाड कमजोर मुला, तर परमेश्वरला आत्मासेन य्हाड्दा हो लला। हो लबा भिबा चा खाहड् लसी प्रार्थना लतोःला भिसी आसेबा धुइरी य्हाडसे पाड्बारीन आखम्बा तामग्याम परमेश्वरला आत्मासे य्हाडला साटोरी प्रार्थना लला। २७ ओच्छे परमेश्वरला आत्मासे म्हन्बा ताम जम्मालान सेमला ताम था याड्बा परमेश्वरदा था मुला। तिग्दा भिसम परमेश्वरला आत्मासे हाडला म्हिगदेला साटोरी परमेश्वरसे म्हन्बा अन्छार प्रार्थना लमुला।

२८ परमेश्वरसे हाडसे म्हन्बा अन्छार धम्बा जम्मान म्हिगदेदेन थेदा माया लबा म्हिगदेला लागिरी जम्मान स्हेगदेदा ज्यबा तना लमुला भिबा ताम य्हाडदा था मुला। २९ ख्रीष्ट जम्मान ज्योज्यो आले नाना आडागदेला ज्योज्यो दोगै भिसी जम्बुलिङ स्होबा भन्दा डाच्छाहेन्सेन परमेश्वरसे हाडसे डोसेबा म्हिगदेदा धम्जी। ओच्छे थेनीगदेदा हाडला भा हड्बान

स्होबारी पक्का लजी। ३० जुन जुन म्हिदा परमेश्वरसे डाच्छान धम्मुबा, थेनीगदेदा हाडलान सन्तान दोबारी ड्योइजी। ड्योइमाहेन्से थेनीगदेदा परमेश्वरला डाच्छा ज्यबा म्हि हिन्ना भिसी सुड्जी। परमेश्वरला डाच्छा ज्यबा म्हि हिन्ना भिसी सुड्माहेन्से परमेश्वरसे थेनीगदेदा हाडसे याड्बा मानदेन य्हाल याड्बा हकएनोन पिन्जी।

परमेश्वरला माया

३१ थेहड् भिसम चु तामगदेला बारेरी य्हाडसे तिग पाड्तोःबा? चुदे परमेश्वरनोन य्हाडपट्टि मुला भिसम य्हाडदा खाल्से ढाखम्ला? ३२ परमेश्वरसे हाडलान भादा मी बाँकी आथान्ना य्हाडला लागिरी पिन्जी भिसम तिग थेसे हाडला भादेन छ्यामनोन य्हाडदा जम्मान स्हे आपिन? ३३ परमेश्वरसे धम्बा म्हिगदेला बिरोधरी खाल्से दोष उन्खम्ला? परमेश्वरसेन थेनीगदेदा हाडदा सेम निबा म्हि भिसी सुड्बा मुला। ३४ थेतबासेलमा य्हाडदा सजाय पिन्गो भिसी खाल्से पाड्खम्ला? तिग्दा भिसम य्हाडसे नातोःबा सजाय ख्रीष्ट येशूसेन नासी सिजी। थे सिबाग्याम सोसी दान्दे स्वर्गला मुल ठिरी धन्छ्याबा मुला। ओच्छे य्हाडला लागिरी परमेश्वरदेन छ्याम

प्रार्थना लबा मुला। ^{३५}दाहेन्से य्हाडदा दुख कष्ट, बिरोध, चआम्याड्बा, क्वानआम्याड्बा, आपत विपत, साइबारी म्हाइबा चु तामसे य्हाडदा ख्रीष्टला मायाग्याम फेबारी खम्ला? ^{३६}परमेश्वरला बचनरीनोन चुहड् भिसी भिबा मुला,

“हाडला लागिरी डन्दा धिन

धिननोन साइबा मुला,

ओच्छे डन्दा साइबारी ठीक लबा

ग्युदा हड् नोन लमुला।”*

^{३७}तर चु जम्मान ताम तसैनोन य्हाडदा माया लबा ख्रीष्टग्यामसेन य्हाडसे चु जम्मानथोरी ढाबा मुला। ^{३८-३९}तिगदा भिसम कालला शक्तिगदे मुसै, सिसै, सोसै, स्वर्गदूतगदे मुसै, शासन लबागदे मुसै, दान्देला तामगदे मुसै, लिच्छा तसेला तामगदे मुसै, नर्गला शक्तिगदे मुसै, मुरी मुबा शक्ति मुसै, जम्बुलिडरी मुबा शक्ति मुसै, खजिबै स्हेगदे मुसै ख्रीष्ट येसूग्यामसे य्हाडदा परमेश्वरसे लबा मायाग्याम फेबारी आखम भिबा ताम डादा था मुला।

परमेश्वरसे धम्बा म्हिगदे

६ डा ख्रीष्टला म्हि तबासे लमा सत्य ताम पाड्बान मुला, डाइ लुसीला ताम पाड्बा आरे। डाइ सत्य ताम पाड्बान मुला भिबा ताम डाला सेमदा था मुला, ओच्छे डाइ लुसीला ताम पाड्बा आरे भिसी परमेश्वरला

आत्मादा था मुला। ^२डाला सेमरी ल्हानान दुखदेन सुर्दा सदन तबा मुला। ^३डा ख्रीष्टग्याम फेमा डाला य्हुलला ज्योज्यो आले नाना आडागदेसे थाबा याड्बा हिन्सम डा हाडला म्हिगदेला लागिरी सजाय नाबारीनोन तयार तसेला मुबा। ^४थेनीगदे इस्राएलीगदे हिन्ना, थेनीगदेदा परमेश्वरसे हाडलान कोलागदे स्होजी, ओच्छे थेनीगदेदा अर्गु य्हुलला म्हिगदेग्याम हाडला य्हालदेन शक्ति उन्जी। थेहड् लसीन थेनीगदेदा मोलम पिन्ना भिसी कबुल लजी, ओच्छे ठिम पिन्जी। थेनीगदेसे परमेश्वरदा खाहड् लसी तेन्तोःला भिसीएनोन लोप्जी, ओच्छे परमेश्वरसे पिन्ना भिसी लबा कबुलगदे थेनीगदेला न हिन्ना।* ^५चुगदे अब्राहाम, इसहाकदेन याकूबला सन्तान हिन्ना। थाबा पिन्बा ख्रीष्टएनोन चुनोन वंशग्याम म्हि ल्हुइ किन्सी न्हबा हिन्ना। जम्मानथोरी शासन लबा परमेश्वर थाबा पिन्बा ख्रीष्टनोन हिन्ना। थेला सदन जयजयकार तगै। आमेन।

^६परमेश्वरसे इस्राएलीगदेदेन छ्याम लबा कबुल पूरा आलबा आहिन, तर थेनीगदे परमेश्वरसे कुल्बा अन्छार आभ्रनी। थेतबासेलमा थेनीगदे जम्मान इस्राएलला सन्तान तसैनोन परमेश्वरला कोलागदे आदोनी। ^७ओच्छे अब्राहामला सन्तान तजी

भिदेमा जम्मान थेला भा भामे आत।
तिग्दा भिसम परमेश्वरसे अब्राहामदा
सुड्बा ताम बचनरी चुहङ् लसी भिबा
मुला, “इसहाकग्याम न्हबागदेदा जे
एला सन्तान भिला।”^{* ८} चु भिबा
चा अब्राहामला जम्मान सन्तान
परमेश्वरला कोलागदे आहिन। तर
परमेश्वरसे लबा कबुलग्याम^१ न्हबा
कोलागदे जे अब्राहामला सन्तान
हिन्ना। ^६तिग्दा भिसम परमेश्वरसे
अब्राहामदेन चुहङ् लसी कबुल लबा
मुबा, “तोगब लबा धुइरी डा दोःसी
खला, जमा धुइरी एला भिड सारासे
भा गिक न्हला।”^{*}

^{१०} ओते जे आहिन, यहाडला म्हेमे
इसहाकग्याम रिबेकासे जौल्या कोला
न्हबा मुबा। ^{११}परमेश्वरसे म्हन्बा
अन्छार थेसे धम्बा ताम पूरा लबाला
लागिरी थे जौल्या कोलागदे न्हबा
भन्दा डाच्छान जजा कोलादा धम्जी।
थेनीगदेसे ज्यबा आज्यबा गे लबा
भन्दा डाच्छान परमेश्वरसे थे कोलादा
धम्बा मुबा। ^{१२}चु चा म्हिगदेसे लबा गे
अन्छार आहिन, तर यहाडदा ड्योइबा
परमेश्वरसे म्हन्बा अन्छार हिन्ना।
तिग्दा भिसम परमेश्वरसे रिबेकादा
“थेबा भा चा च्याड्बा भाला
नोकर दोला” भिसी सुड्बा मुबा।^{*}

^{१३}परमेश्वरला बचनरीनोन चुहङ्
लसी, “डाइ याकूबदा माया लजी, तर
एसावदा चा हेला लजी” भिसी भिबा
मुला।^{*}

^{१४}थेहङ् भिसम यहाडसे तिग
पाड्तोःबा? तिग परमेश्वरसेनोन
अन्याय लला? पक्कान आल!

^{१५}तिग्दा भिसम परमेश्वरसे मोशादा,
“जुन म्हिदा डाइ दया लबा सेम
मुला, डाइ थेदा दया लला।
ओच्छे जुन म्हिदा डाइ माया लबा
सेम मुला, डाइ थेदान माया
लला”

भिसी सुड्बा मुला।^{*}

^{१६}थेतबासेलमा चु दया चा न्ह
यहाडला सेमसे म्हन्बासे लमा हिन्ना
न्ह यहाडसे गे लबारी म्हाइबासे लमा
हिन्ना, तर परमेश्वरसे म्हन्बा अन्छार
हिन्ना। ^{१७}मिश्र यहुल्साला ग्ले फारोदा
परमेश्वरसे “एग्याम डाला शक्ति
उन्बादेन जम्बुलिङ नाडनोन डाला
मिन थेःना लगै भिबा सेमसे डाइ एदा
ग्ले स्होबा हिन्ना” भिसी सुड्बा ताम
बचनरी भिबा मुला।^{*} ^{१८}थेतबासेलमा
परमेश्वरसे जुन म्हिदा दया लबा सेम
मुला थेदा दया लला, ओच्छे जुन
म्हिला सेम कोड्ना लबा सेम मुला
थेला सेम कोड्ना लला।

६:८ चु पदरी “कबुल” भिबा चा पावलसे येशू ख्रीष्टग्याम थार्बा याड्बा समाचारला बारेरी
पाड्बा ताम हिन्ना।

६:७ उत्प २१:१२ ६:६ उत्प १८:१० ६:१२ उत्प २५:२३ ६:१३ मला १:२-३

६:१५ प्रस्था ३३:१६ ६:१७ प्रस्था ६:१६

१६ एनीगदे न्हडला खालैसे डादा चुहङ् भिसी पाङ्ला, “थेहङ् भिसम परमेश्वरसे तिगदा अझ दोष लबा? तिगदा भिसम परमेश्वरसे म्हन्बा तामदा खालैसेन बिरोध लबारी आखम।” २० म्हि तसीनोन परमेश्वरदेन छ्याम जोहाब लबा ए खाल हिन्ना? तिग साप्राग्याम स्होबा ताडसे हाडदा स्होबा म्हिदा “तिगदा डादा चुहङ्बा स्होबा?” भिसी ड्योइला।* २१ तिग हाडसे ज्योप्बा साप्राग्याम कोइ ताड ज्यबा खाल्ला, कोइ ताड आज्यबा खाल्ला स्होबा हक कुमालेदा आरे?*

२२ थेहङ् लसीन परमेश्वरदाएनोन हाडला बोमोदेन शक्ति उन्बा सेम मुला। तर सजाय पिन्तोःबा म्हिगदेदाएनोन सजाय आपिन्ना अझ नासीन धन्छ्याबा मुला। २३ ओच्छे हाडसे डाच्छान ड्योइबा म्हिगदेदा परमेश्वरसे हाडला घेन य्हालदेन शक्ति ओच्छे ल्हानान दया उन्बाला लागिरीन चुहङ् लसी नाबा मुबा। २४ तिगदा भिसम परमेश्वरला म्हिगदे य्हाडनोन हिन्ना। थेसे यहूदीगदे न्हडग्याम जे ड्योइबा आहिन, तर अर्गु यहूलला म्हिगदे न्हडग्यामएनोन ड्योइजी। २५ परमेश्वरसे सुङ्बा ताम होशे भिबा अगमवक्तासे चुहङ् लसी भिबा मुला,

“जुन म्हिगदे ‘डाला म्हि आहिन्मुबा,’
थेनीगदेदा डाइ ‘डाला म्हि स्होला।’

ओच्छे जुन म्हिदा ‘डाइ माया लबा आरेबा,’

थेनीगदेदा ‘डाइ माया लला।’”*

२६ ओच्छे,

“जुन ग्लारी थेनीगदेदा,
‘एनीगदे डाला म्हि आहिन’
भिसी भिमुबा,
थेनोन ग्लारी थेनीगदेदा,
‘छोन्बो परमेश्वरला कोलागदे’
भिसी भिला।”*

२७ इस्राएलीगदेला बारेरी यशैया अगमवक्तासेनोन चुहङ् भिसी पाङ्बा मुला,

“इस्राएलीगदे समुन्द्रला बालुवा ते मुसैनोन
थेनीगदे न्हडला कोइ कोइसे जे थार्बा याङ्ला।

२८ तिगदा भिसम प्रभुसे हाडला बचन अन्छार

योनान जम्बुलिङला म्हिगदेदा
सजाय पिन्सी नाश लला।”*

२९ यशैया अगमवक्तासे इस्राएली-गदेला बारेरी चुहङ् भिसीनोन पाङ्बा मुला,

“चुदे जम्मान भन्दा शक्तिशाली
परमेश्वरसे य्हाडला लागिरी

सन्तान गिकनोन आख्लाबा
हिन्सम

य्हाङएनोन सदोमदेन गमोराला
म्हिगदे हङ लसीन नाश तसेला
मुबा।”*

यहूदीगदेसे विश्वास आलबा

३० चु जम्मान तामला अर्थ चा
तिग हिन्ना? चु भिबा चा अर्गु
य्हलला म्हिगदेसे परमेश्वरदा सेम
निबा म्हि दोबारी आम्हाइसैनोन
थेनीगदेदा परमेश्वरसे हाडदा सेम
निबा म्हि स्होजी। चु जम्मान ताम
थेनीगदेला विश्वासग्याम तजी। ३१ तर
इस्त्राएलीगदे चा थे ठिम अन्छार
भ्रसी परमेश्वरदा सेम निबा म्हि
दोबारी ल्हानान भड लजी तसैनोन
दोआखम्नी। ३२ तिग्दा आखम्नी?
तिग्दा भिसम थेनीगदेसे विश्वास
आलना लबा गेग्याम परमेश्वरदा
सेम निबा म्हि दोबारी म्हाइजी।
थेतबासेलमा थेनीगदे युडबारी तोइजी,
ओच्छे थे युडबासे थेनीगदेदा हिल्ना
लजी। ३३ परमेश्वरला बचनरीनोन
चुहङ् भिसी भिबा मुला,
“च्यागो, डाइ सियोनरी† थेनीगदेदा
तोइना लबा युडबा गिक थान्ना,
थे युडबारी ल्हानान म्हिगदे तोइला
ओच्छे थेनीगदेदा हिल्ना
लला।

तर थेदा विश्वास लबा खालै
म्हिगदेदा पे:ना आल।”*

१० ज्योज्यो आले नाना
आडागदे, परमेश्वरसे
इस्त्राएलीगदेदा थाना लगे भिसी डाइ
सेमहेन्सेन म्हन्बा मुला, ओच्छे प्रार्थना
लबा मुला। २ थेनीगदेसे परमेश्वरदा
ल्हानान तेन्बारी म्हाइबा मुला भिबा
ताम डाइ पक्का लसी पाङ्खम्ला।
तर थेनीगदेसे तेन्बा चा ठीक ज्ञान
बुद्धिग्याम आहिन। ३ तिग्दा भिसम
परमेश्वरसे थेनीगदेदा हाडदा सेम
निबा म्हि स्होला भिबा ताम था
आयाङ्ना, थेनीगदे हाडलान गेग्याम
परमेश्वरदा सेम निबा म्हि दोबारी
म्हाइजी। तर थेनीगदे परमेश्वरसे
हाडदा सेम निबा म्हि स्होला भिबा
तामला तहरी आचिनी। ४ तिग्दा
भिसम ख्रीष्टदा विश्वास लबा म्हिगदे
परमेश्वरदा सेम निबा म्हि दोगै भिसी
ख्रीष्टसेन ठिमला गे पूरा लजी।

जम्मासेन थार्बा याङ्खम्ला

५ “ठिमरी पाङ्बा अन्छार परमेश्वरदा
सेम निबा म्हि दोबारी म्हाइबागदे ठिम
अन्छारनोन भ्रतो:ला” भिसी मोशासे
भिबा मुला।* ६ तर विश्वासग्याम
परमेश्वरदा सेम निबा म्हि दोबा
तामसे चुहङ् भिसी पाङ्बा मुला,
“एनीगदेसे सेम न्हडरी ‘खाल स्वर्गरी

६:३३ “सियोन” भिबा चा यरूशलेम शहरदा पाङ्बा हिन्ना।

६:२६ यशै १:६ ६:१० यशै २८:१६ १०:५ लेवी १८:५

निला?’ भिसी थापाङ्गो, चु भिबा चा ख्रीष्टदा मार भबारी हिन्ना।* ७ ओच्छे ‘ल्हानान नुप्बा व्हाङ्गोना’ खाल निला?’ भिसी एनोन एनीगदेसे हाङला सेम न्हडरी थापाङ्गो।” चु भिबा चा ख्रीष्टदा सिबाग्याम सोना लसी तोर भबारी हिन्ना। ८ तर चु बचनसे तिग पाङ्बा मुला? “परमेश्वरला बचन एनीगदेदेन छ्यामनोन मुला। ओच्छे एनीगदेला सेमदेन सुडरीन मुला।” डन्से थेःना लबा चुनोन बचनसे म्हिगदेदा विश्वास लबारी ड्योइबा मुला।* ९ तिग्दा भिसम चुदे एसे येशूदान प्रभु हिन्ना भिसी पाङ्बादेन परमेश्वरसेन थेदा सिबाग्याम सोना लबा हिन्ना भिसी सेमहेन्सेन विश्वास लजी भिसम ए थार्ला। १० तिग्दा भिसम हाङला सेमहेन्से विश्वास लबा म्हिदा परमेश्वरसे हाङदा सेम निबा म्हि हिन्ना भिसी सुडला, ओच्छे येशूदा प्रभु हिन्ना भिसी पाङ्बासे लमान थेसे थार्ला याङ्ला। ११ परमेश्वरला बचनरीनोन “थेदा विश्वास लबा म्हिगदे खालैनोन पेःआतोः” भिसी भिबा मुला।* १२ तिग्दा भिसम यहूदीदेन अर्गु य्हलला म्हिगदे न्हडरी तिगै फरक आरे। प्रभु गिक जे मुला, थेनोन प्रभु जम्मालान प्रभु हिन्ना। थेदेन

छ्याम ह्रीबा म्हिगदेदा थेसे ल्हानान मोलम पिन्ना। १३ तिग्दा भिसम बचनरी “प्रभुला मिन किन्बा म्हिगदे जम्मासेन थार्ला याङ्ला” भिसी भिबा मुला।*

१४ तर प्रभुदा विश्वास लबान आरे भिसम म्हिगदेसे खाहङ् लसी प्रभुदेन छ्याम ह्रीसे? प्रभुला बारेरी थेःबान आरे भिसम थेनीगदेसे खाहङ् लसी प्रभुदा विश्वास लसे? ओच्छे खालै म्हिसे थेनीगदेदा प्रभुला बारेरी थेःना लबान आरे भिसम थेनीगदेसे खाहङ् लसी था याङ्से? १५ ओच्छे थेःना लबा म्हिनोन आपुइना खाहङ् लसी थेःबा? परमेश्वरला बचनरीनोन “थार्ला पिन्बा समाचार थेःना लबा म्हिगदे खमा गाते ल्हानान ताङ्तोःबा ताम हिन्ना” भिसी भिबा मुला।*

१६ तर थेनीगदे न्हडला कोइ कोइ म्हि थार्ला पिन्बा समाचार अन्छार आभ्रनी। तिग्दा भिसम यशैया अगमवक्तासेन “प्रभु, डन्से थेःना लबा तामदा खाल्से विश्वास लबा मुला?” भिसी भिबा मुला।* १७ विश्वास चा थार्ला पिन्बा समाचार थेःसी खमुला, ओच्छे थे थार्ला पिन्बा समाचार चा ख्रीष्टला बारेरी पाङ्बा ताम हिन्ना।

१८ थेहङ् भिसम डाइ एनीगदेदा ड्योइला, “तिग थेनीगदेसे थेःबा

१०:७ “ल्हानान नुप्बा व्हाङ्गो” भिबा चा म्हङ म्हुङ चिबा ग्ला हिन्ना (लूका ८:३१;

उन्बा ६:१, २, ११; ११:७; १७:८; २०:१, ३)।

१०:६ व्यय ३०:१२ १०:८ व्यय ३०:१४ १०:११ यशै २८:१६ १०:१३ योए २:३२

१०:१५ यशै ५२:७ १०:१५ यशै ५३:१

आरेबा?” आहिन, थेनीगदेसे पक्कान थे:बा मुला। तिग्दा भिसम परमेश्वरला बचनरी

“मुदेन स्वर्गला काइ जम्बुलिङ नाडनोन थे:बा मुला,
ओच्छे थेनीगदेसे परमेश्वरला बारेरी पाङ्बा ताम
जम्बुलिङला जम्मान ग्लारी धोबा मुला”

भिसी भिबा मुला। *

१६ डाइ दो:सीनोन इयोइला, “तिग इस्राएलीगदेसे आघोनी?” परमेश्वरसे मोशाग्याम डाच्छान थेनीगदेदा

“जुन म्हि खजिबै यहुलला आहिन मुबा, थेनोन यहुलला म्हिदा धम्सी डाइ एनीगदेला सेमरी डाह तना लला।

ओच्छे आघोबा मूर्ख म्हिगदेदा थाना लसी डाइ एनीगदेदा बोमो खना लला”

भिसी सुङ्बा मुबा। *

२० परमेश्वरसे सुङ्बा ताम अभ्र आँट लसी यशैया अगमवक्तासे चुहङ् लसी भिबा मुला,

“डादा म्हाइनोन आम्हाइबागदेसे डादा स्याप्बा मुला,

ओच्छे जुन म्हिसे डादा आम्हाइनी थेनीगदेला गुडरी डा हाडनोन थोन्जी” *

२१ इस्राएलीगदेला बारेरी परमेश्वरसे चुहङ् भिसी सुङ्बा मुला,

“डाला ताम आङ्ग्यान्बादेन सेम कोङ्बा म्हिगदेदा ‘खउ’ भिसी डाइ धिन गिक या पिन्जी।” *

यहूदीगदेदा परमेश्वरसे लबा दया

११ थेहङ् भिसम डाइ एनीगदेदा इयोइला,

“तिग परमेश्वरसे हाडला म्हिगदेदा रुलाबा हिन्ना?” पक्कान आहिन! तिग्दा भिसम ख्रीष्टदा विश्वास लबा डाएनोन अब्राहामला वंशरी न्हबा बेन्यामीनला† सन्तान इस्राएली हिन्ना। * २ परमेश्वरसे डाच्छाहेन्सेन डोसेबा हाडला म्हिगदेदा रुलाबा आरे। एलिया अगमवक्ताला बारेरी परमेश्वरला बचनरी पाङ्बा ताम मी एनीगदेदा थानोन मुला। एलिया अगमवक्तासे इस्राएलीगदेला बिरोधरी परमेश्वरदेन छायाम चुहङ् लसी बिन्ती लबा मुबा, ३ “प्रभु, थेनीगदेसे हाडला अगमवक्तागदेदा साइबा मुला ओच्छे हाडदा बलि फुल्बा ग्लागदे फुप्सी पिन्बा मुला, सोबा चा डा जे हिन्ना, डादाएनोन साइबारी थेनीगदेसे म्हाइबान मुला।” * ४ तर परमेश्वरसे थेदा “डाइ डाला लागिरी हजार निस म्हिगदेदा जोगब लसी थान्बा मुला,

११:१ “बेन्यामीन” भिबा म्हि चा इस्राएलला च्युक न्ही कोलागदे न्हडला गिक हिन्ना।

१०:१८ भजन १६:४ १०:१६ व्यव ३२:२१ १०:२० यशै ६५:१ १०:२१ यशै ६५:२

११:१ फिलि ३:५ ११:३ १ राजा १६:१०-१४

थेनीगदेसे बाल भिबा लदा फ्या लबा
आरे” भिसी सुङ्जी।* ५थेहङ् लसीन
परमेश्वरला दयामायाग्याम धम्बागदे
न्हङला कोइ कोइ म्हिगदे दान्देनोन
मुला। ६चु चा दयामायाग्याम तबा
हिन्ना, ठिम अन्छार लबा गेग्याम
आहिन। चुदे ठिम अन्छार लबा गेग्याम
तबा हिन्सम दयामाया आचिसेला
मुबा।

७थेतबासेलमा चुहङ् तजी,
इसाएलीगदेसे जुन स्हे म्हाइमुबा थे स्हे
थेनीगदेसे आयाङ्नी। तर परमेश्वरसे
धम्बागदेसे जे थे स्हे याङ्जी। तर
आयाङ्बागदेला चा सेम कोङ्जी।
८परमेश्वरला बचनरीनोन चुहङ् भिसी
भिबा मुला,

“परमेश्वरसे थेनीगदेदा तिगै ताम
घोबारी आखम्बा आत्मा
पिन्बा मुला,
ओच्छे म्हाङ्नोन आम्राङ्बा मीदेन
थे:नोन आथे:बा नाब्यङ
पिन्बा मुला,
दान्देधोनाएनोन थेनीगदे थेहङ्बान
मुला।”*

९ओच्छे दाऊदसेनोन चुहङ् भिसी
पाङ्बा मुला,

“थेनीगदेला भोजएनोन थेनीगदेला
लागिरी भूबा वादेन फुप
हङ्बान तगै।

ओच्छे थेनीगदेला चबा स्हे थान्बा
टेबुलरी ठोकसी थेनीगदे हिल्लै,

थेनीगदेसे फातो:बा पापला सय
फातो:गै।

१०थेनीगदेला मी काना तगै,
ओच्छे थेनीगदेला छिक्मा खाइमै
सोजो थातगै।”*

११थेतबासेलमा एनीगदेसे डाला
ताम ड्यान्गो, “तिग नाश तबारीन
इसाएलीगदे ठोकसी हिल्ला हिन्ना?”
आहिन। तर थेनीगदेसे पाप लबासे
लमान थेनीगदेसे याङ्तो:बा थाबा
अर्गु य्हुलला म्हिगदेसे याङ्जी। तिग्दा
भिसम चु म्हाङ्सी इसाएलीगदेसे थाबा
याङ्बारी सेम लगै भिसीन चुहङ् तबा
हिन्ना। १२इसाएलीगदेसे पाप लबासे
लमा अर्गु य्हुलला म्हिदेन जम्बुलिङला
जम्मान म्हिगदेसे मोलम याङ्जी।
थेनीगदे परमेश्वरसे कुल्बा अन्छार
भ्रआखम्बासे लमा अर्गु य्हुलला
म्हिगदेसे थाबा याङ्जी भिसम भन
इसाएलीगदेसेनोन परमेश्वरसे कुल्बा
ताम ड्यान्बा हिन्सम गाते ल्हानान
मोलम याङ्सेला मुबा।

अर्गु जम्मान य्हुलसे थाबा याङ्बा

१३दाहेन्से डाइ एनी अर्गु य्हुलला
म्हिगदेदा चु ताम पाङ्ला, डा अर्गु
य्हुलला म्हिगदेला लागिरी मुल चेला
दोबासे लमा डाइ चु गे लम्पाङ्जी।
थेतबासेलमा डाला सेम ल्हानान
ताङ्बा मुला। १४डाला ह्वाङलान
य्हुलला म्हिगदेसे एनीगदेदा डाह

लसी थेनीगदे न्हडला कोइ कोइ चा परमेश्वरपट्टि दोःसी थाबा याङ्ला वा भिबा आशसे डाइ चुहङ् लबा हिन्ना।
 १५ तिग्दा भिसम थेनीगदेदा परमेश्वरसे रूलामा जम्बुलिङला जम्मान म्हिगदे परमेश्वरला म्हि दोजी भिसी दोःसी थेनीगदेदा परमेश्वरसे हाडला म्हि स्होबा चा जम्बुलिङला जम्मान म्हिगदे सिबाग्याम सोबा तेबान आहिन?
 १६ चुदे गेड खाङ्बारी ज्योप्बा ब्राग्याम जजाकी परमेश्वरदा फुल्जी भिसम थे गेड खाङ्बारी ज्योप्बा जम्मान ब्रा चोखो तला। थेहङ् लसीन दोडला टा ज्यबा मुसम थे दोडला हाँगाएनोन ज्यबा तला।

१७ थेहङ् लसीन दोडला हाँगा क्युइसी निबा हङ् लसी गाते इस्राएलीगदेसेनोन परमेश्वरदा रूलासी निबा मुला। तर एनी अर्गु यहुलला म्हिगदे चा हिरी खबा जैतूनना हाँगा दिमरी मुबा जैतूनना दोडरी थुइबा हङ् लसी थुइबा मुला। दाहेन्से एनीगदे टा गिकग्यामसेन शक्ति याङ्सी सोला।
 १८ थेतबासेलमा एसे थे क्युइसी निबा हाँगा हङ्बा इस्राएलीगदेदेन छ्याम घमण्ड थालउ। चुदे घमण्डन लबा हिन्सम चु ताम ढन्गो, तिग्दा भिसम ए चा हाँगा जे हिन्ना, एसे टादा ताबा आहिन। तर टासे चा एदा ताबा हिन्ना। १९ तर एसे चुहङ् भिसी पाङ्ला, “डादा थुइबाला लागिरीन थे हाँगागदे क्युइबा मुबा।” २० एसे पाङ्बा तामएनोन ठीकनोन हिन्ना,

येशूदा विश्वास आलबासे लमा थेनीगदे क्युइबा हाँगा हङ्बान मुबा। तर एनीगदे चा विश्वास लबासे लमा सोबा हिन्ना। थेतबासेलमा एनीगदेसे घमण्ड थालउ, तर परमेश्वर प्राङ्सी लोङ्गो। २१ तिग्दा भिसम परमेश्वरसे डाच्छाहेन्सेन मुबा हाँगागदेदा मी भ्याङ्जी भिसम एनीगदे थुइबा हाँगागदेदाएनोन भ्याङ्ला।

२२ थेतबासेलमा परमेश्वरसे गाते ल्हानान दया लमुला भिबादेन गाते खरो व्यवहार लमुला भिबा ताम एनीगदेसे था याङ्सी जिन्बा मुला। थेदा विश्वास आलबागदेदा थेसे खरो व्यवहार लजी। तर थेदा विश्वास लबा एनीगदेदा परमेश्वरसे दया लजी। तर एनीगदेसे थेला दयादा म्लेःजी भिसम एनीगदेदाएनोन थासी भ्याङ्ला। २३ चुदे थेनीगदेसे हाडला सेम दोःसी विश्वास लजी भिसम हाँगादा हङ् लसी थुइला। तिग्दा भिसम परमेश्वरसे थेनीगदेदा दोःसी गिक स्होबारी खम्ला। २४ अर्गु यहुलला म्हि एनीगदे चा हिरी खबा जैतूनना दोङ्ग्याम थासी भबा हाँगा हङ्बान हिन्ना। हिरी खबा जैतूनदेन दिमरी मुबा जैतून आढिक्सैनोन एनीगदेदा दिमरी मुबा जैतून दोडला हाँगारी थुइबा मुला। इस्राएलीगदे चा दिमरी मुबा जैतूनना हाँगा हङ्बान हिन्ना। थेतबासेलमा थेनीगदेदा दोःसी भसी थुइबारी परमेश्वरदा भन सजिलो तला।

जम्मानथोरी परमेश्वरला दयामाया मुला

२५ ज्योज्यो आले नाना आडागदे,
परमेश्वरला सेमला ताम एनीगदेसेनोन
था याङ्गै भिबा डाला सेम मुला।
थे ताम था याङ्गजी भिसम एनीगदेसे
हाडसे हाडदान घेन म्हि आस्हो। थे
ताम चा चुनोन हिन्ना, परमेश्वरला
लागिरी स्त्रीष्टदा विश्वास लबा
अर्गु यहुलला म्हिगदे आछ्योतेधोना
जे इस्राएलीगदेला सेम कोड्ला।
२६ जमाहेन्से जम्मान इस्राएली
यहुलदाएनोन थाना लला। परमेश्वरला
बचनरीनोन चुहङ्ग भिसी भिबा मुला,
“थार्बा पिन्बा म्हि सियोनग्याम
फेप्खला,
ओच्छे याकूबग्याम पाप गेगदे
भ्याङ्ला।”*

२७ “ओच्छे प्रभुसे ‘थेनीगदेला पापला
दोष मेटब लसी डाइ थेनीगदेदेन
छ्याम लबा डाला कबुल पूरा लला’
भिसी सुङ्गबा मुला।”*

२८ एनी अर्गु यहुलला म्हिगदेला
गुडरी थार्बा पिन्बा समाचार धोबाला
लागिरी इस्राएलीगदे परमेश्वरला
शत्रु दोबा हिन्ना। तर थेनीगदेला
आखे म्हेमेसे लमा अझ थेनीगदे
परमेश्वरसे धम्बा म्हि हिन्ना। ओच्छे
थेनीगदेदा परमेश्वरसे माया लमुला।
२९ तिगदा भिसम परमेश्वरसे हाडसे

मोलम दोःसी आकिन, ओच्छे हाडसे
धम्बागदेदाएनोन खाइमै आख्ला।
३० डाच्छा एनीगदेसेनोन परमेश्वरसे
कुल्बा ताम आङ्ग्यान्मुबा। तर
इस्राएलीगदेसे परमेश्वरसे कुल्बा
ताम आङ्ग्यान्बासे लमा दान्दे
एनीगदेसे परमेश्वरला दया
याङ्गबा हिन्ना। ३१ थेहङ्ग लसी
दान्दे इस्राएलीगदे अटेरी तसी
चिबासे लमा परमेश्वरसे एनीगदे
अर्गु यहुलला म्हिगदेदा दया लबा
हिन्ना। एनीगदेदा दया लबा म्हाङ्गसी
तिरेकुनु थेनीगदेसेनोन दया याङ्गला।
३२ जम्मान म्हि अटेरी तबासे लमा
परमेश्वरसे थेनीगदेदा थेनीगदेला
पापरी खीसी थान्बा मुला। चुहङ्ग
लबा चा तिरेकुनु जम्मान म्हिगदेसे
परमेश्वरला दया याङ्गै भिसी
हिन्ना।

जयजयकारला व्हाइ

३३ ओहो, परमेश्वरला दया गाते
ल्हाना!

थेला ज्ञान बुद्धि गाते घेन!
ओच्छे थेसे पक्का लसी जिन्बा
ताम खाल्से घोखम्ला?
थेला ग्याम खालैसेन म्हाङ्गबारी
आखम!*

३४ “तिगदा भिसम प्रभुला सेमला
ताम खाल्से था याङ्गबा
मुला?

ओच्छे थेदा सल्लाह पिन्बा म्हि
खाल मुला?”*

३५“परमेश्वरसे छे फाबारी
खाल्से परमेश्वरदा छे पिन्बा
मुला?”*

३६तिग्दा भिसम जम्मान स्हे
परमेश्वरग्याम खबा हिन्ना।
जम्मान स्हे थेसेन स्होबा हिन्ना।
ओच्छे जम्मान स्हे थेलान
लागिरी स्होबा हिन्ना।
थेतबासेलमा सदन परमेश्वरला
मानदेन जयजयकार तगै।
आमेन।*

परमेश्वरदा सेम निबा बलि

१२ थेतबासेलमा ज्योज्यो
आले नाना आडागदे,
एनीगदेदा परमेश्वरसे ल्हानान दया
लबासे लमा परमेश्वरसे कुल्बा
अन्छार भ्रबारी एनीगदेसे हाड
हाडला ल्हुइ परमेश्वरदा सेम
निबा छोन्बोदेन चोखो बलि दोसी
परमेश्वरदा जिम्मा पिन्गो भिबा डाला
बिन्ती मुला। एनीगदेसे परमेश्वरदा
सेमहेन्सेन तेन्बाएनोन चुनोन हिन्ना।
२जम्बुलिडला म्हिगदेला हड्बा
बानीबेहोर थोसी थाभ्रउ, बरु एनीगदेसे
हाडला सेम परमेश्वरपट्टि दोःसी
छार म्हि दोगो। थेहड् लजी भिसम

जे एनीगदेसे परमेश्वरला सेमला ताम
घोबारी खम्ला। ओच्छे खजिबा ताम
ज्यबादेन परमेश्वरदा सेम निबा ओच्छे
सत्य हिन्ना भिसी था याड्खम्ला।

३डाथोरी परमेश्वरला दयामाया
मुबासे लमा एनीगदे जम्मादान
डाला चु बिन्ती मुला, एनीगदेसे
हाडसे हाडदान घेन थाम्हन्गो। तर
परमेश्वरसे पिन्बा विश्वास† अन्छार
हाड खाहड्बा मुला थे भन्दा घेन
दोबारी थाम्हाइगो। ४चु चा य्हाडला
ल्हुइ हड्बान हिन्ना। तिग्दा भिसम
य्हाडला ल्हुइ गिक मुसैनोन थेरी या,
काड, ना, सुड ल्हानान थरीला स्हेगदे
मुला। तर चु जम्मान स्हेगदेसे गे
गिकनोन आल। ५थेहड् लसीन य्हाड
ल्हानान मुसैनोन ख्रीष्टदेन छ्याम
गिक तबासे लमा य्हाड ल्हुइ गिक
हड्बान हिन्ना, ओच्छे य्हाड जम्मान
हाड हाड न्हडरी या, काड, ना, सुड
हड्बान हिन्ना।* ६थेतबासेलमा
परमेश्वरसे दयामाया लसी य्हाडदा
पिन्बा थरी थरीला मोलमगदे अन्छार
य्हाडसे गे लइ। अगमवाणी पाड्बा
मोलम याड्बा म्हिसे हाडला विश्वास
अन्छार पाड्गै, ७स्थहान्दोदा हो लबा
मोलम याड्बा म्हिसे सेमहेन्सेन हो
लगै, स्थहान्दोदा लोप्बा मोलम याड्बा
म्हिसे ज्यना लसी लोप्जै, ८स्थहान्दोदा

१२:३ चु पदरी “विश्वास” भिबा चा परमेश्वरसे म्हिगदेदा पिन्बा शक्तिदेन मोलमगदे हिन्ना।

११:३४ यशै ४०:१३ ११:३५ अय्यूब ४१:११ ११:३६ १ कोर ८:६

१२:४-५ १ कोर १२:१२

आँट पिन्बा मोलम याङ्बा म्हिसे आँट पिन्नै, स्थहान्दोदा दान पिन्बा मोलम याङ्बा म्हिसे सेमहेन्सेन ताङ्सी पिन्नै, शासन लबा मोलम याङ्बा म्हिसे ज्यना लसी शासन लगै ओच्छे दया लबा मोलम याङ्बा म्हिसे सेमहेन्सेन ताङ्सी दया लगै। *

स्थहान्दोदा माया लउ

६ एनीगदेसे सुडसे जे आहिन सेमहेन्सेन माया लउ। ओच्छे जुन ताम आज्यबा मुला थे तामला संगतनोन थालउ। तर जुन ताम ज्यबा मुला सदन थे अन्छार भ्रउ। १० ज्योज्यो आले नाना आडा न्हडरी माया लबा हङ् लसी जम्मादान माया लउ। ओच्छे एनीगदेदा लबा मान भन्दा स्थहान्दोदा भन ल्हाना मान लउ। ११ एनीगदे आब्लेना सदन भन्सी गे लउ, ओच्छे सेमहेन्सेन परमेश्वरदा तेन्गो। १२ एनीगदेसे जुकजुकधोनाला जुनी याङ्ला भिसी लबा आशरी ताङ्गो, ओच्छे जस्तोन दुख तसैनोन नासी सदन प्रार्थना लसी चिउ। १३ परमेश्वरला म्हिगदेदा खाँचो तबा धुइरी ह्यो लउ, ओच्छे हाडला दिमरी खबा डोन्बोदा ज्यना लसी क्योङ्गो।

१४ एनीगदेदा दुख पिन्बा म्हिगदेदा मोलम पिन्गो। थेनीगदेदा के:बा

आहिन, बरु मोलम पिन्गो। *

१५ ताङ्बा म्हिगदेदेन छ्याम एनीगदेएनोन ताङ्गो, ओच्छे दुख तसी क्राबा म्हिगदेदेन छ्याम एनीगदेएनोन क्रागो। १६ जम्मान म्हिगदेदेन छ्याम ठिक्सी चिउ। एनीगदेसे खाइमै घमण्ड थालउ, तर सोजो म्हिगदेदेन छ्याम भ्रउ। ओच्छे हाडसे हाडदान घेन म्हि स्होसी थाभ्रउ। *

१७ खालैसे आज्यबा लजी भिदेमा एसे थेदा आज्यबा थालउ। बरु जम्मान म्हिगदेसे ज्यबा भिसी म्हन्बा तामरी जे भ्रउ। १८ खम्तेधोना एनीगदे जम्मान म्हिगदेदेन छ्याम ठिक्सी चिउ। १९ डाला सेम निबा ह्योगदे, एनीगदे हाडसे खाइमै खालैदेन छ्याम बदला थाकिन्गो, तर परमेश्वरदान जिम्मा पिन्गो। तिग्दा भिसम बचनरीनोन चुहङ् भिसी भिबा मुला, “बदला किन्बा गे डाला हिन्ना, डाइनोन थेनीगदेदा बदला किन्ना”

भिसी परमप्रभुसे सुङ्बा मुला। *

२० बरु,

“एला शत्रु खेन्बा फुइबा मुसम थेदा चबा थुङ्बा पिन्गो थेहङ् लजी भिसम एला शत्रु हाडनोन पे:ला।”† *

१२:२० ग्रीक ग्योइरी चा “एसे थेला थोबोरी मे भुरो उम्ला” भिसी भिबा मुला।

१२:६-८ १ कोर १२:४-११ १२:१४ मत्ती ५:४४; लूका ६:२८ १२:१६ हितो ३:७

१२:१६ व्यव ३२:३५ १२:१० हितो २५:२१-२२

२१ एनीगदे आज्यबा गे लबागदेदेन छ्याम थाब्रेगो, बरु ज्यबा गे लसी थेनीगदेदा ढागो।

शासन लबागदेला तहरी चिउ

१३ शासन लबा म्हिगदेसे कुल्बा ताम जम्मासेन ड्यान्तोःमुला। तिगदा भिसम परमेश्वरसे शासन लबा हक आपिन्नी भिसम खालैसेन शासन लबारी आखम। शासन लबा जम्मान म्हिगदेदा परमेश्वरसेन धम्बा हिन्ना।
 २ थेतबासेलमा शासन लबा म्हिगदेदा बिरोध लबा म्हिगदेसे परमेश्वरसे कुल्बा तामदा बिरोध लबा हिन्ना। जुन जुन म्हिसे बिरोध लला, थेसे सजाय याड्ला।
 ३ तिगदा भिसम शासन लबा म्हिगदे म्राड्सी ज्यबा गे लबा म्हिगदे आहिन, तर आज्यबा गे लबा म्हिगदे जे लोड्मुला। तिग एनीगदे शासन लबा म्हिगदेदेन छ्याम आलोड्ना चिबा सेम मुला? थेहड् भिसम एनीगदेसे ज्यबा गे लउ। जमाहेन्से एनीगदेसे थेनीगदेग्याम स्याबास याड्ला।
 ४ तिगदा भिसम शासन लबागदे परमेश्वरला गे लबा म्हिगदे हिन्ना। परमेश्वरसे एनीगदेदा ज्यबा लबारीन थेनीगदेदा धम्बा हिन्ना। एसे आज्यबा गे लजी भिसम जे थेनीगदेदेन छ्याम लोड्गो। तिगदा भिसम थेनीगदेदेन छ्याम सजाय

पिन्बा अधिकार मुला। शासन लबा म्हिगदे चा आज्यबा गे लबा म्हिगदेदा सजाय पिन्बा परमेश्वरला गे लबा म्हिगदे हिन्ना।
 ५ थेतबासेलमा परमेश्वरग्याम सजाय आयाड्बारी जे आहिन, तर एनीगदेला सेमला तामला लागिरी एनीगदे शासन लबागदेला तहरी चितोःला।

६ थेतबासेलमान एनीगदेसे तिरो फामुला। तिगदा भिसम शासन लबा म्हिगदे चा सदन आज्यबा गेगदे लआपुड्बा परमेश्वरला गे लबा म्हिगदे हिन्ना।
 ७ एनीगदेसे तिग तिग लदोमुला थे पूरा लउ, तिरो फातोःबा ग्लारी तिरो फागो ओच्छे मान लतोःबा म्हिदा मान लउ।*

गिकसेम गिकदा माया लउ

८ एनीगदेसे स्थान्दोला लागिरी लतोःबा तिगै गे बाँकी थाथान्गो, तर गिकसेम गिकदा माया लबारी चा खाइमै थाख्लागो। तिगदा भिसम हाडला खिम्जेमदा माया लबा म्हिसे चा ठिमरी मुबा जम्मान ताम पूरा लबा हिन्ना।
 ९ “ए स्थान्दोदेन छ्याम ब्रेल्सी थाभ्रउ, एसे म्हि थासाइगो, एसे य्हो थालउ, एसे लोभ थालउ,” भिसी कुल्बा तामगदेदेन अर्गु कुल्बा जति तामगदे मुला थे जम्मान तामगदे चा “एसे हाडला खिम्जेमगदेदा हाडदा हड्नोन माया लउ” भिसी कुल्बा ताम

न्हडरी स्याप्ला।* १०माया लबा म्हिसे
हाडला खिम्जेमदा न्होङ्ना आल।
थेतबासेलमा माया लबा चा ठिम पूरा
लबा हिन्ना।

११चु जे आहिन, चु धुइ चा य्हाड
म्हेर्बाग्याम रे:तो:बा धुइ हिन्ना भिबा
ताम एनीगदेदा थानोन मुला। तिग्दा
भिसम डाच्छा य्हाडसे विश्वास
लबा धुइरी भन्दा भन दान्दे थार्बा
याङ्बा धुइ तसी जिन्बा मुला। १२म्हुन
निसी य्हाल तबारीन छ्याइबा मुला।
थेतबासेलमा य्हाडसे धोपधोपरी
लबा जम्मान आज्यबा गेगदे रूलागे,
ओच्छे य्हालला सेना दोसी चिइ।
१३ओच्छे य्हालरी भ्रबा म्हि दोसी
सोजो तसी गे लइ। म्हुनड हङ् लसी
मोजमजा लबा, ड्य्होइसी भ्रबा, ब्रेल्सी
भ्रबा, छाडा तसी भ्रबा, छेबा बङ्बा
लबा, ओच्छे डाह लबा गेगदे य्हाडसे
रूलागे। १४तर प्रभु येशू ख्रीष्ट हङ्बान
दोसी भ्रउ, ओच्छे पापी बानीबेहोर
अन्छार लहुइला लागिरी जे लइ म्हन्बा
थे लसी थाभ्रउ।

स्थान्दोदा दोष थालउ

१४ विश्वासरी कमजोर मुबा-
गदेदा हाडलान ज्योज्यो
आले नाना आडा म्हन्गो। तर
थेनीगदेसे म्हन्बा तामगदेला बिरोध
लबाला लागिरी आहिन।* २कोइ

कोइसे चा जम्मान स्हे चबारी
तमुला भिसी विश्वास लमुला, तर
विश्वासरी कमजोर मुबा म्हिगदेसे
चा ढापढुप जे चमुला। ३एनी जम्मान
स्हे चबागदेसे ढापढुप जे चबागदेदा
जजा थाम्हन्गो। थेहङ् लसीन
एनी आचबागदेसेनोन चबागदेदा
दोष थालउ। तिग्दा भिसम चबा
म्हिगदेदाएनोन परमेश्वरसे हाडला
कोलागदे म्हन्बा मुला। ४स्थान्दोला
नोकरदा दोष लबा ए खाल हिन्ना?
थेला हाडलान मालिकसे गा नोकरसे
ज्यबा गे लबा हिन्ना कि आज्यबा
गे लबा हिन्ना भिसी निसाफ लला।
प्रभुसेन हाडला म्हिगदेदा जम्मान
गेरी ज्यबा तना लला। तिग्दा भिसम
थेदा हो लबा शक्ति प्रभुदेन छ्याम
मुला।

५कोइ कोइ म्हिसे अर्गु धिन
भन्दा चु धिन ज्यबादेन मुल हिन्ना
भिसी म्हन्मुला। तर कोइ कोइसे
चा जम्मान धिन ओस्पन हिन्ना।
जम्मान म्हिगदेसे हाड हाडला
सेमरी विश्वास लबा अन्छार ढुक्क
ततो:ला।† ६खजिबै धिनदा ज्यबादेन
मुल धिन हिन्ना भिसी म्हन्बा म्हिसे
परमेश्वरदा मान लबाला लागिरी
म्हन्बा हिन्ना। स्या चबा म्हिगदेसे
चबा धुइरी परमेश्वरदा मान लमुला।
तिग्दा भिसम थेनीगदेसे परमेश्वरदा

१४:५ चु पदरी पावलसे यहूदी धर्मला ठिम अन्छार ज्यबा धिन भिसी पाङ्बा मुला।

१३:६ प्रस्था २०:१३-१५, १७; व्यव ५:१७-१९; लेवी १९:१८ १४:१-६ कल २:१६

धन्यवाद पिन्मुला। ओच्छे स्या
आचबा म्हिगदेसेनोन आचबा
धुइरी परमेश्वरदा मान लमुला।
तिगदा भिसम थेनीगदेसे परमेश्वरदा
धन्यवाद पिन्मुला। ७तिगदा भिसम
य्हाड खालैनोन ह्वाडलान लागिरी
सोएनोन आसो ओच्छे सिएनोन
आसि। ८य्हाड सोसै प्रभुला लागिरीन
सोला ओच्छे सिसैनोन प्रभुला
लागिरीन सिला। थेतबासेलमा
य्हाड सिसै सोसै प्रभुलान हिन्ना।
९थेतबासेलमा ख्रीष्ट सिजी ओच्छे
सिबाग्याम सोसी सिबादेन सोबागदे
जम्मालान प्रभु दोजी

१०थेहड् भिसम, तिगदा एनीगदेसे
ह्वाडला ज्योज्यो आले नाना
आडागदेदा दोष लबा? ओच्छे तिगदा
थेनीगदेदा जजा म्हन्बा? तिगदा भिसम
परमेश्वरसे निसाफ लबा धुइरी य्हाड
जम्मान थेला डाच्छापट्टि राप्तो:ला।*
११तिगदा भिसम बचनरीनोन चुहड्
भिसी भिबा मुला,

“ ‘च्यागो, डाइ घान फासी पाङ्ला,
जम्मासेन डादा फ्या लला,
ओच्छे जम्मासेन डादा परमेश्वर
भिसी

जयजयकार लला’

भिसी प्रभुसे सुड्बा मुला।”*

१२थेतबासेलमा य्हाड जम्मासेन
परमेश्वरदा ह्वाड ह्वाडला हिसाब
उन्तो:ला।

स्थहान्दोदा फसब थालउ

१३थेतबासेलमा य्हाडसे गिकसेम
गिकदा दोष आलइ। बरु दाहेन्से
ह्वाडला ज्योज्यो आले नाना
आडागदेदा न्होङ्ना लबा गे खाइमै
आलबारी पक्का लइ। १४प्रभु येशूदा
विश्वास लबासे लमा चु ताम डादा
था मुला, खजिबै चबा स्हे ह्वाडनोन
चीबु आत। तर खालै म्हिसे खजिबै
चबा स्हे चीबु हिन्ना भिसी म्हन्जी
भिसम थेला लागिरी थे चबा स्हे
चीबुन तला। १५एसे चबा स्हेसे
लमा एला आलेला विश्वासदा
ज्यबा आतनी भिसम एसे ह्वाडला
आलेदा माया लबा आरे। ख्रीष्टसे
ह्वाडला ज्याननोन पिन्सी सोना लबा
एला आले एसे चबा स्हेसे लमा
नाश थातगै। १६थेतबासेलमा एदा
ज्यबा छोर्बा तामदा आज्यबा भिसी
स्थहान्दोसे बिरोध थालगै। १७तिगदा
भिसम परमेश्वरला यहुल्सा चा चबा
थुड्बा ताम आहिन। तर चु चा
परमेश्वरदा सेम निबा म्हि दोबाला
बारेरी, शान्ति पिन्बाला बारेरी
ओच्छे ताड्बा तामला बारेरी हिन्ना।
चु जम्मान परमेश्वरला आत्माग्याम
खबा हिन्ना। १८चुहड् लसी ख्रीष्टदा
तेन्बा म्हिसे परमेश्वरदा ताङ्ना लला,
ओच्छे म्हिगदेसेनोन थेदा ज्यबा म्हि
भिसी पाङ्ला।

१६ थेतबासेलमा य्हाङसे सदन ह्वाङ ह्वाङ न्हङरी शान्ति पिन्बा तामदेन गिकसेम गिकदा विश्वासरी कोङ्ना लबा गे जे लइ। २० एसे चबा स्हेला लागिरीन परमेश्वरला गेदा न्होङ्ना थालउ। पाङ्गोन तोःमा जम्मान चबा स्हे चोखो मुला, तर ह्वाङसे चबा स्हेग्याम स्थान्दोदा न्होङ्ना लबा चा ज्यबा आहिन। २१ स्या चमा, इय्होइबा स्हे थुङ्मा एला ज्योज्यो आले नाना आङाला विश्वास न्होङ्ना भिसम एसे आचबादेन आथुङ्बान ज्यबा तला।

२२ एसे जुन विश्वास लबा मुला थे विश्वासदा एदेन परमेश्वर न्हङरी थान्गो। जुन म्हिसे चु ताम ठीक हिन्ना भिसी ह्वाङला सेमरी तिगै आज्यबा आम्हन्ना पक्का लला थे म्हि ताङ्गला। २३ तर खालै म्हिसे तिगै स्हे शङ्का लसी चजी भिसम थे म्हि परमेश्वरला डाच्छा दोषी तला। तिग्दा भिसम विश्वास अन्छार आलबा जुन ताम तसैनोन पाप हिन्ना।

स्थान्दोदा हो लउ

१५ य्हाङ विश्वासरी कोङ्ना मुबागदेसे विश्वासरी कमजोर मुबागदेदा हो लतोःला। ओच्छे य्हाङसे ह्वाङदा ज्यबा तबा गे जे आहिन, तर स्थान्दोदाएनोन वास्ता लतोःला। २ य्हाङ जम्मासेन स्त्रीष्टदा विश्वास लबागदेदा ज्यबा तगै,

ओच्छे थेनीगदे विश्वासरी कोङ्ना तगै भिसी य्हाङसे थेनीगदेदा वास्ता लतोःला। ३ तिग्दा भिसम स्त्रीष्टसेनोन ह्वाङदा ज्यबा तबा गे जे आलनी। परमेश्वरला बचनरीनोन “ह्वाङदा हेला लबागदेसे डादाएनोन हेला लबा मुला” भिसी भ्रिबा मुला।* ४ तिग्दा भिसम बचनरी भ्रिबा जम्मान तामगदे य्हाङदा लोप्बाला लागिरी भ्रिबा मुबा, चु बचनग्यामसेन य्हाङसे लबा आश याङ्बाला लागिरी जस्तोन दुख तसैनोन नाबारी आँट याङ्गला।

५ दुख नाखम्बा शक्तिदेन आँट पिन्बा परमेश्वरसेन एनीगदेदा स्त्रीष्ट येशू ह्वाङ्बान दोसी भ्रबारीदेन ह्वाङ ह्वाङ न्हङरी ढिकसी चिखम्बा सेम पिन्गै। ६ ओच्छे एनीगदे जम्मान ढिकसी सुङ गिक तसी य्हाङला प्रभु येशू स्त्रीष्टला आबा परमेश्वरला जयजयकार लबारी खम्मौ।

अर्गु य्हलला म्हिगदेला लागिरी थार्बा पिन्बा समाचार

७ थेतबासेलमा स्त्रीष्टसे एनीगदेदा माया लबा ह्वाङ लसी परमेश्वरदा मान लबारी एनीगदेसे ह्वाङ ह्वाङ न्हङरी गिकसेम गिकदा मान लउ। ८ एनीगदेसे डाला ताम इयान्गो, येशू स्त्रीष्टसे लबा गेसे परमेश्वर विश्वास लखम्बा परमेश्वर हिन्ना भिसी यहूदीगदेदा उन्बारी हिन्ना। ओच्छे येशू स्त्रीष्टसे

य्हाडला आखे म्हेमेदेन छ्याम लबा
कबुल पूरा लजी। ९थेहङ् लसीन
अर्गु य्हुलला म्हिगदेसे परमेश्वरसे
लबा दयाला लागिरी परमेश्वरला
जयजयकार लगै भिसीएनोन येसू
स्त्रीष्टसे चु गे लबा हिन्ना। बचनरीनोन
चुहङ् भिसी भिबा मुबा,

“थेतबासेलमा डाइ अर्गु य्हुलला
म्हिगदेला गुडरी हाडला
जयजयकार लला,

ओच्छे हाडलान जयजयकार तबा
व्हाइ गोला।”*

१०दोःसी चुहङ् भिसीनोन भिबा मुला,

“अर्गु य्हुलला म्हिगदे,
परमेश्वरला म्हिगदेदेन छ्याम
ताङ्गो।”*

११दोःसीनोन चुहङ् भिसीनोन भिबा
मुला

“अर्गु य्हुलला जम्मान म्हिगदे,
प्रभुलान जयजयकार लउ,
ओच्छे जम्मान म्हिगदेसे
प्रभुला जयजयकार लगै।”*

१२दोःसी यशैया अगमवक्तासेनोन

चुहङ् भिसी पाङ्बा मुला,
“यिशैला[†] वंशग्याम म्हि गिक
फेप्खला,

थेसे अर्गु य्हुलला म्हिगदेथोरी
शासन लला,

ओच्छे अर्गु य्हुलला म्हिगदेसेनोन

थेथोरी आश लला।”*

१३आश तना लबा परमेश्वरदा
विश्वास लबासे लमा थेसेन शान्ति
पिन्सी एनीगदेदा पूरान ताङ्ना लगै।
थेहङ् लसम एनीगदेसे लबा आश
परमेश्वरला आत्मांला शक्तिग्याम
ल्हेबान निला।

अर्गु य्हुलला म्हिगदेला लागिरी
पावलसे लबा गे

१४ज्योज्यो आले नाना आडागदे,
एनीगदे ल्हानान ज्यबा मुला, ओच्छे
एनीगदेला जम्मान ज्ञान बुद्धिसे
गिकसेम गिकदा लोप्बारी खम्मुला
भिबा ताम डादा था मुला। १५तसैनोन
परमेश्वरसे डादा दयामाया लबासे
लमा एनीगदेदा ढन्ना लबाला लागिरी
डाइ चु तामगदे भिबारी आँट लबा
मुला। १६परमेश्वरसे दयामाया लसी
डादा अर्गु य्हुलला म्हिगदेला गुडरी
गे लबाला लागिरी स्त्रीष्ट येसूला मुल
चेला स्होजी। ओच्छे अर्गु य्हुलला
म्हिगदे परमेश्वरला आत्माग्याम
चोखो तसी परमेश्वरदा सेम निबा भेटी
दोगै भिसी डाइ परमेश्वरला मन्दिररी
पूजा लबा म्हि हङ्बा दोसी थाबा
पिन्बा समाचार थेःना लजी।

१७थेतबासेलमा स्त्रीष्ट येसूसे
डाग्याम परमेश्वरला लागिरी डाइ

१५:१२ “यिशै” चा दाऊद ग्लेला आबा हिन्ना।

१५:६ २ शमू २२:५०; भजन १८:४६ १५:१० व्यव ३२:४३ १५:११ भजन ११७:१

१५:१२ यशै ११:१०

लतोःबा गे लम्याडुमा डा ल्हानान
ताड्बा मुला। १८ स्त्रीष्टदा विश्वास
लबा अर्गु यहुलला म्हिगदेदा
परमेश्वरसे कुल्बा अन्छार भ्रबा
म्हि स्होबारी स्त्रीष्टसे डाग्याम लबा
तामदेन गेला बारेरी जे डाइ पाड्बारी
भड लला। १९ डाइ परमेश्वरला
आत्माला शक्तिग्याम उदेकला
चिनुगदेदेन उदेकला गेगदे लजी।
थेहड् लसीन डाइ यरूशलेमहेन्से
इल्लुरिकन भिबा यहुल्साधोनान
स्त्रीष्टला थार्बा पिन्बा समाचार पूरान
थेःना लजी। २० स्थहान्दोसे थान्बा
जगथोरी दिम स्होबा म्हिसे हड् लसी
स्थहान्दोसे थेःना लबा ग्लारी थेःना
लबा डाला सेम आरे। थेतबासेलमा
स्त्रीष्टला मिन आथेःबादेन खालैसेन
थेःना आलबा ग्लारी जे थार्बा पिन्बा
समाचार थेःना लबा डादा सेम मुला।
२१ बचनरीनोन चुहड् लसीन भ्रिबा
मुला,

“थेला बारेरी जुन म्हिदा खाइमै
पाड्बा आरे,
थेनीगदेसे थेदा म्राड्ला।
ओच्छे थेला बारेरी जुन म्हिसे
खाइमै थेःबा आरे
थेनीगदेसे परमेश्वरदा डोसेला”*

पावल रोमरी निइ म्हन्बा

२२ थेतबासेलमान डाइ चु ग्लागदेरी
स्त्रीष्टला समाचार थेःना लसी

भ्रबासे लमा डा ल्हानान रेम एनीगदे
मुबा ग्लारी खबारी म्हाइसैनोन
खबारी आखम्नी। २३ तर दाहेन्से
चु ग्लारीक्यार डाइ थार्बा पिन्बा
समाचार थेःना लसी जिन्बा मुला।
ल्हानान दिडहेन्से एनीगदेदेन छ्याम
हुप तबा सेम मुबासे लमा, २४ डा
स्पेन भिबा यहुल्सारी निबा धुइरी
एनीगदेदेन छ्याम चिसी तिगै
धिनधोना संगती लबा सेम मुला।
ओच्छे एनीगदेदेन छ्याम तिगै
धिनधोना चिमाहेन्से डा थेग्याम
स्पेनरी निबा धुइरी एनीगदेसे डादा
हो लला भिसी डाइ म्हन्बा मुला।
२५ तर दान्दे चा डा परमेश्वरला
म्हिगदेदा हो लबारी यरूशलेम
शहररी निबान मुला। २६ तिगदा भिसम
माकेडोनियादेन अखैया भिबा ग्लारी
मुबा परमेश्वरला म्हिगदेसे ताड्सी
यरूशलेम शहररी मुबा परमेश्वरला
म्हिगदे न्हडला प्राड्बोगदेदा टाडगा
पुइखबा मुला। २७ चु टाडगा पिन्बारी
थेनीगदेदा ल्हानान सेम मुबा।
तर थेनीगदेसे यहूदीगदेदा पिन्बा
टाडगा चा थेनीगदेसे फातोःबा छे
हड्बान हिन्ना। तिगदा भिसम अर्गु
यहुलला म्हिगदेसे याड्बा स्वर्गला
मोलम यहूदीगदेग्यामसे याड्बा
हिन्ना। २८ थेतबासेलमा चु टाडगा
हुप्सी थेनीगदेदा भोर्सी पिन्माहेन्से
एनीगदे मुबा ग्लारी खसी डा स्पेनरी

निला। २६ओच्छे डा एनीगदे मुबा ग्लारी खमा येशू ख्रीष्टसे पिन्बा मोलमगदेएनोन भसी खला।

३०ज्योज्यो आले नाना आडागदे, यहाङला प्रभु येशू ख्रीष्टदेन परमेश्वरला आत्मासे पिन्बा मायाग्याम डाला लागिरी डादेन छ्यामनोन परमेश्वरदेन छ्याम प्रार्थना लसी पिन्गो भिबा डाला बिन्ती मुला। ३१ख्रीष्टदा विश्वास आलबा यहूदिया अञ्चलरी मुबा म्हिगदेग्याम जोगब तबारी खम्यै भिसी डाला लागिरी परमेश्वरदेन छ्याम प्रार्थना लसी पिन्गो। ओच्छे यरूशलेमरी मुबा परमेश्वरला म्हिगदेदाएनोन डाइ हुप्सी भबा टाङगा सेम निगै भिसीएनोन प्रार्थना लसी पिन्गो। ३२थेहङ लसीन परमेश्वरला सेम मुसम डा एनीगदे मुबा ग्लारी ताङ्सी ताङ्सी खला। ओच्छे डा एनीगदेदेन छ्यामनोन चिसी ब्लप्बा न्हला। ३३शान्ति पिन्बा परमेश्वर एनीगदे जम्मानदेन छ्याम तगै। आमेन।

फ्याफुल्ला

१६ दाहेन्से डाइ मण्डलीदा हो लबा यहाङला आडा फिबी गाते ज्यबा मुला भिसी एनीगदेदा डोसेना लला। थे किंक्रिया भिबा ग्लाला मण्डलीरी हो लबा

म्हि हिन्ना। २थेसे ल्हानान म्हिगदेदा हो लबा मुला ओच्छे डादाएनोन ल्हानान हो लबा मुला। थेतबासेलमा परमेश्वरला म्हिगदेदा मान लबा हङ लसी थेदाएनोन मान लउ। ओच्छे एनीगदेसे थेदा तिग तोःबा थे स्हेरी खमन्तेधोना हो लउ।

३डादेन छ्यामनोन ख्रीष्ट येशूला गे लबा प्रिस्कादेन^१ थेला हेम्बो अकिलासदा फ्याफुल्ला। ४थेनीगदेसे डादा जोगब लबाला लागिरी हाङला ज्याननोन पिन्बारी तयार तजी। डाइ थेनीगदेदा खाइमै म्लेःबारी आखम, डाइ जे आहिन, अर्गु यहुलला जम्मान मण्डलीगदेसेएनोन थेनीगदेदा म्लेःबारी आखम। ५थेनीगदेला दिमरी मुबा मण्डलीदाएनोन फ्याफुल्ला।

ओच्छे एशिया अञ्चलरी जम्मान भन्दा डाच्छा ख्रीष्टदा विश्वास लबा डाला सेम निबा हो इपेनितसदा फ्याफुल्ला। ६एनीगदेला लागिरी ल्हानान गे लसी पिन्बा मरियमदाएनोन फ्याफुल्बा मुला भिसी पाङ्सी पिन्गो। ७डादेन छ्यामनोन भयाल्खानरी मुबा डाला यहूदी होदेन एन्डोनिकस ओच्छे युनियस आडादा फ्याफुल्बा मुला भिसी पाङ्सी पिन्गो। चेलागदे न्हङरी थेनीगदेएनोन जम्मासेन डोसेबा मुल चेलागदे हिन्ना। डाइ भन्दा डाच्छा

16.3 ग्रीक बाइबलरी चु पददेन १ कोरिन्थी १६:१६ पदरी जे प्रिस्का भिसी भिबा मुला। अर्गु जम्मान ग्लारी प्रिस्किला भिसी भिबा मुला। प्रिस्का भिबादेन प्रिस्किला भिबा म्हि गिकनोन हिन्ना।

थेनीगदेसे ख्रीष्टदा विश्वास लबा मुबा।

८ओच्छे प्रभुरी डाला सेम निबा हो एम्प्लीआतसदाएनोन डाइ फ्याफुल्बा मुला भिसी पाङ्सी पिन्गो। ९य्हाडदेन छ्यामनोन ख्रीष्टला लागिरी गे लबा उर्बानसदेन डाला सेम निबा हो स्ताखुसदाएनोन फ्याफुल्बा मुला भिसी पाङ्सी पिन्गो। १०अपेल्लेसदाएनोन फ्याफुल्ला। थेसे सेमहेन्से ख्रीष्टदा लबा विश्वासला ताम उन्बा मुला। थेहङ् लसीन अरिस्तोबुलसला दिमरी मुबागदे जम्मादान फ्याफुल्ला। ११डाला यहूदी आले हेरोदियनदेन प्रभुदा विश्वास लबा नर्किससला दिमरी मुबागदे जम्मादान फ्याफुल्ला।

१२प्रभुला ल्हानान गे लबा त्रुफेना आडादेन त्रुफोसादा ओच्छे प्रभुला लागिरी ल्हानान गे लबा डाला सेम निबा आडा परसीसदा फ्याफुल्ला। १३प्रभुसे धम्बा रूफसदेन थेला आमादा डाइ फ्याफुल्बा मुला भिसी पाङ्सी पिन्गो। थेला आमासे डादाएनोन हाडलान भादा हङ् लसी माया लमुला। १४ओच्छे असिंक्रितस, फलेगन, हर्मेस, पत्रोबासदेन हर्मास ओच्छे थेनीगदेदेन छ्याम मुबा जम्मान ज्योज्यो आले नाना आडागदेदाएनोन फ्याफुल्ला। १५थेहङ् लसीन फिलोलोगस, युलिया आडा, नेरियसदेन थेला आडा, ओलिम्पास ओच्छे थेनीगदेदेन छ्याम मुबा परमेश्वरला म्हिगदे जम्मादान

फ्याफुल्ला। १६एनीगदे हाड हाड न्हडरी गिकसेम गिकदा सेमहेन्सेन माया लसी फ्याफुल्गो। डन्से सेमहेन्सेन माया लसी फ्याफुल्बा मुला भिसी जम्मान मण्डलीगदेसे पाङ्बा मुला।

१७ज्योज्यो आले नाना आडागदे, एनीगदेदा लोप्बा तामदा बिरोध लबादेन हाडसे हाडदान विश्वासी भिसी एनीगदेला विश्वासदा न्होङ्ना लबारी म्हाइबा म्हिगदे म्हाङ्सी होशियार तसी चिउ। थेहङ्बा म्हिगदेला संगतनोन थालउ भिबा डाला बिन्ती मुला। १८तिगदा भिसम थेहङ्बा म्हिगदेसे य्हाडला प्रभु येशू ख्रीष्टला लागिरी आहिन, तर हाडला फो न्हबाला लागिरी जे गे लमुला। ओच्छे ज्यबा ज्यबा ताम लसी सोजो म्हिगदेदा धोका पिन्मुला। १९एनीगदे परमेश्वरसे कुल्बा अन्छार भ्रमुला भिबा ताम जम्मादान था मुला। चु म्हाङ्सी डाएनोन ल्हानान ताङ्बा मुला। थेहङ् लसीन ज्यबा ज्यबा तामला बारेरी एनीगदेसे बुद्धि याङ्गै तर आज्यबा तामला बारेरी तिगै था आतगै भिसी डाइ म्हन्बा मुला। २०शान्ति पिन्बा परमेश्वरसे शैतानदा योनान एनीगदेला काड धिरी थान्ना। य्हाडला प्रभु येशू ख्रीष्टला दयामाया एनीगदेदेन छ्याम तगै।

२१डादेन छ्याम गे लबा तिमोथीसे एनीगदेदा फ्याफुल्ला भिसी पाङ्बा मुला। थेहङ् लसीन डाला

यहूदी आले लुकियस, यासोनदेन
सोसिपात्रोससेनोन एनीगदेदा
फ्याफुल्बा मुला। ^{२२}पावलला लागिरी
चु चिठी भिसी पिन्बा प्रभुरी हाडनीला
आले डा तर्तियससेनोन जम्मादान
फ्याफुल्ला। ^{२३}डा चिबा दिमला
धनी गायसदेन थेला दिमरी मुबा
मण्डलीगदेसेनोन फ्याफुल्ला भिसी
पाङ्बा मुला। ओच्छे चु शहरला
कोष अध्यक्ष इरास्तसदेन आले
क्वार्टससेनोन एनीगदेदा फ्याफुल्बा
मुला। ^{२४}य्हाडला प्रभु येशू ख्रीष्टला
दयामाया एनीगदेदेन छ्याम तगै।
आमेन।†

^{२५}य्हाड जम्मासेन परमेश्वरदा मान
लइ। थार्बा पिन्बा ख्रीष्टला बारेला

ताम दडबोहेन्सेन छुम्सी थान्बा
मुबा। तर दान्दे एनीगदेसे चु ताम
था याङ्बा मुला। चु ताम डाइ थेःना
लबा येशू ख्रीष्टला बारेरी पाङ्बा
तामग्यामसे एनीगदेसे था याङ्बा
मुला। ^{२६}थेतबासेलमा दान्दे चु
जम्मान तामगदे अगमवक्तासे भिबा
तामगदेग्याम था याङ्ना लमुला।
ओच्छे जम्मासेन विश्वास लसी
परमेश्वरसे कुल्बा ताम ड्यान्गै भिसी
खाइमै म्हासी आनिबा परमेश्वरसे
कुल्बा तामग्याम जम्मान यहुलला
म्हिगदेसे चु जम्मान ताम थेःबा मुला।
^{२७}ओच्छे जम्मान ताम था याङ्बा
परमेश्वर गिक जेला येशू ख्रीष्टग्याम
सदन मानदेन जयजयकार तगै। आमेन।